


EPYO Y'OVIRIKANYIHA

 Miyo koothanla ohiy'ula wa yoosoma yaamukhani, osoma wamukhani, Apwiya yatthuna vale, onivaha enihimy'aya, ya Matewu Owarya 13:24 mpakha 30. Ni nave tho miyo—miyo kintthuna kisome okhuma 36 mpakha 40, okathi vakhani paahi. Vano Matewu Owarya, ekapitulu 13, opacerya n'iversikulu 24 y'ekapitulu 13 ya Matewu Owarya. Nwiriyaane oratta-ene osommwa wa Masu. Moolumo aka anoovonya, masi Awawe khanivonyeya.

Aahahimeerya atthu nlikanyiho nikina, iiraka, Omwene wa wirimu onlikana ni mulopwana mmosa aanle epyo yooreera mmatta mw'awe:

Masi owo arupaka, nwanani awe aahirwa khwaala-mo nthakathaka eriyari y'etriku, khurowa.

Masi munyepu vannuwalyaya, khwiima mihokorokho, vano naahikhumelela nthakathaka nave-tho.

Vano arumeyi a mwaneene etthoko yaahirowa omukoha wira, Pwiya, khimwaanle nyuwo epyo yooreera mmatta mwanyu? nthakathaka ninkhuma vai?

Nto owo aahahimeerya, Nwanani t'irale eyo. Vano arumeyi yaahimuhimeerya wira, Munnitthuna wira hiyo nrowe...naphele-mo?

Masi owo khwira, Nnari; maana mwaaphelaka nthakathaka, munoophela vamosa ni etriku.

Muhiye soopiili sinnuweke vamosa mpakha okathi w'ohepha: nto okathi yowo w'ohepha miyo kinimwaaruma alipa-oohepha, Mpacerye ophela nthakathaka, mutthukwe mavisi mpahe: masi etriku muthukumanye muhele mmuruttuni mw'aka.

² Nyuwo mooweha, “Mpacerye ophela nthakathaka, mutthukwe mavisi?” Vano, kisomaka ela, yaahikhala etthu yootikiniha yaakirweenle okathi waakilaanth'aka Omwakoni Catalina ohiyu uwo, kivekelaka. Nto miyo kaahuupuwela, “Kaarowa ophwanya vai nuulumo kaarow'aka owerya ohimya wa yela miyo kaatthun'aka olavula ohiy'ula?”

³ Nto miyo kikhuruwa kiphwanya nuulumo *ovirikanyiha*, tivo miyo kaakunx'aka etaphulelo ya moolumo kiweha etthu nuulumo *ovirikanyiha* nnihimy'aya. Nto nno nnihimya wira “waala ohiiwanana,” wala—wala, “okhala oovirikanyana,” ntoko Webster sinihimy'awe, “waala ohiiwanana, etthu evirikanne,” ahiso, “okhala oovirikanyana n'ile ekhanle khalai-ene.” Tivo miyo kuupuwenly'aka, wira y'osoma ohiy'ula, miyo

kaamwiihana: *Epyo Yovirikanyiha*. Ni kinroromela wira Apwiya anooreerha Masu Aya vano okathi onaatthamel'ahu Yawo.

⁴ Ni hiyo noosuwela tho wira Awo aataphulela, eversikulu 36 ni—ni mpakha 43, moota epyo ela yaatokontthe aya. Nto hiyo nryreene vaavo, nrowe nisome yeyo tu nave, eversikulu 36 vano mpakha 43.

Nto *Yesu aahihya muttitthi w'atthu*, Owo *khurowa owaani: nto awiixutti awe yaahimuthukumanela yowo, yiiraka, Munitaphulele nlikanyiho na nthakathaka na mmatta.*

Vano Owo *aahiwaakhula khaahimeerya wira, Ole onaala epyo yooreera Mwaana a mutthu;*

Vano *ematta olumwenku; epyo yooreera aana a omwene; masi nthakathaka t'ale akhanle aana a mutakhali;*

Nwanani onaala seiyo ti xetwani; ohepha emalelo y'olumwenku; ni alipa-oohepha malaikhaa.

Nto *siisaale ninkuxiw'aya nthakathaka nnapahiwa vamooroni; siiso-tho vanookhala w'omaleloni w'olumwenku ula.*

Mwaana a mutthu onimwaaruma malaikha awe, nto awo animwaathukumanya othene ale anaattheikiha akhw'aya, n'ale aniira sootakhala moomweneni mw'awe;

Nto *animwaarihela omooroni, muttukutthani mwa mooro: nto iwe onookhala-wo wunla, wala onookhala wunla n'olumanyiha maino.*

Nto *anaxariya anrowa waarya ntoko nsuwa moomweneni mw'Atithi aya. Ale ari ni maaru . . . tthiri animwiwa.*

⁵ Owo ti Yesu ataphulelaka nlikanyiho, Mmansawe, tivo hiyo noosuwela nto etthu enihimya ntaphulelo. Nto vano onikhuveel'ahu yela, waala wenna w'epyo ni—ni ohepha, vano Owo onnitaphulela yeyo. Nto vo miyo kookupali wira Yesu aalavula nlikanyiho nla nihiku Nawe, masi aatthuna ohimya wira eyo yaarowa okhala w'omaleloni w'olumwenku, wala, w'omaleloni w'okathi, ori nihiku *nla*. Nto miyo kookupali wira y'osoma ela yaamukhaani ohiy'ula ti yoophwanelaxa wa okathi onikhal'ahu, okhala wira Yesu voowooneya oohimya va wira “othukumanyiwa waarowa okhala w'omaleloni w'olumwenku ula,” wira eyo p'ukathi waarow'aya okhala emalelo; othukumanyiwa w'etriku, nave-tho othukumanyiwa wa nathakathaka n'upahiwa nenlo, n'ukuxiwa etriku oheliwa m'Omweneeni. Nto miyo kookupali wira yaari siisa.

6 Nto Yolempwa ekina enikaaminiha siisa, miyo koolepa va, ti Matewu 24:24, vaavo ehimmy'aya wira, elavulaka mwaha w'e—w'epyo—w'epyo y'ovirikanyiha. Yesu ohimnye wira soopiili saarowa okhala soolattanexa mpakha yaarow'aya omoototha ole Ootthommwa vaari wira yaaniweryaneya. Voohalelaka okhala emosaru.

7 Nipuro nikina mwa Yolempwa valempw'aya, wira epula ennimurupela naxariya ni ootakhala.

8 Miyo kinnuupuwela musuwelelo aka woopacerya wo otoko okhala eriyari y'athu aPentekosite. Miyo kaari oMishawaka, Indiana. Nto kaari vamuthukumanoni muulupale, nipuro nimosa noophiyeryaka ntoko nla, weiwo athu a epante Onikela ephayo ni oOkuusini yaathukumanne aya. Mwaha wa mahiku ale, a ovalaanyana, awo yaahaana okumana osulu iwe. Yaari makhuru manli maalupale aaxinna aPentekosite. Miyo kiira kihinatoko owiwa wala okumana ni yawo khalai. Emaro yoopacerya wiiwaly'aka olavula ilavulelo. Nto w'omalelani w'elinya, ya muthukumano. . . . Miyo kihiraka mpantta wa yawo, miyo kaari mmiravo mulaleyi muPatista paahi, miyo kaakilanthe ottuli. Nto miyo kinnuupuwela emara yoopacerya waatonko aka omwiiwa mutthu olavula ilavulelo, miyo nnakhala nkaasuwela yaari—yaari mwaha wa xeni yothene ela. Vano nto axilopwana ala anli, vanci-enexa, khuvenyasa ohoolo, mmosa aalavula ilavulelo nto mukina aamutaphulela etthu mulopwana ola aahimy'awe. Vano, miyo kipacerya omusoma Bibilia aka paahi vanci-ene saawery'aka, okathi ene yoole, nto miyo kaahiphwanya wira ele yaari Yolempwa. Ti yeyo pahi Yolempwa, Eroho Yowarya yaarow'aya wira.

9 Vano, vaviraly'aya nihiku nimosa numala eyo. . . . Ohiy'ule murim'aka waari woosanka vanci-ene. Miyo kaarumpe mmatta mwa nakhuwo. Nkaarina musurukhu woophiyerya wira kiphwanye ni—ni—nipuro n'omaka, vano miyo kaarina musurukhu woophiyerya orowa owani, vano miyo kithuma mikatthe, saarina mahiku manli, kiireke saari, iphau, wira kikhuure voosiisu. Nto miyo kaahilaleiwa olya ni yawo, masi nkaarina hata musurukhu wira kikhaliherye. Mahiku ale, waari okathi waathonwe musurukhu, 1933, tivo owo waari—owo waari okathi woolipa. Nto vano miyo kuupuwela, "Ahe, miyo ki. . . . Miyo nkinthuna olya n'ale, masi kintthuna osuwela ele arin'aya. Ale aakhalana etthu emosa miyo ehirin'aka."

10 Vano vaasiis'ule miyo kaari. . . . awo khukivekela, "Alaleyi othene murwe vaplataforma mwiisuwanyeihe, nyuwo mw'ani, otthu onikhum'anyu."

11 Vano, miyo—miyo khwira paahi, "William Branham, namalaleya, Jeffersonville," khukilaathi. Vano, okathi ule kaari mulaleyi oomalela oyeva vaplataforma. Nto mmeeloni mwaya awo khukiihana vaplataforma wira kilavule. Nto vo

vamanly'aka olavula, vano, naahiviriha okathi wooreera, nto miyo kipacerya waasuwela atthu anci-ene yaakilattula orowa mukereja mwaya. Nto awo vamanly'aya. . .

¹² Vaviraly'aya yeyo, vano, miyo kuupuwela, "Vaakhanle wira miyo kaaniwerya paahi ophiya vatthu axilopwana ala anli aalupale vaaryaya-vo olavula ilavulelo ni otaphulela!" Eyo yaanivihaha murim'aka, miyo kaanithuna vanci-ene yeyo. Vano, ntoko soohimenryaakani wopaceryani, yoovaha yamukhani enivarel'anyu muteko. Nyuwo moosuwela, soovaha ni wiihaniwa sinikhala w'ohirukunuxa murima, nyuwo munikhalana iyo makhalelo anyu othene, munnona, nyuwo muniyariwa ni seiyo, saari soovaha sa Muluku. Vano miyo okathi wothehe, opacerya okathi waaryaka mwanamwane mwamukhani, eyo yaanikikhumelela okathi wothehe, atthu anikisuwela makhalelo aka othene, annisuwela wira eyo ekeekhai. Vano, kuupuwenleru wira. . . miyo nkaasuwela yaari exeni ile okathi ule, nto miyo kiihanaka yoowoona, miyo nkaasuwela paahi yaari exeni. Masi miyo kuupuwela, "Vaakhanle wira kaamuwerya olavula ni yale!" Vano, nto erooho yaari mpaani yooneya ntoko yaari vekeekhai Erooho ya Muluku.

¹³ Vano miyo—miyo kaahiwerya olavula ni mmosa a yawo, kimukoha sookoha kamosa kamosa, nto owo aari muKristu eekeekhai ooloka. Khivaanyihereya mwaha wa yeyo, mulupwan'ole aari mulipa-oowaamini eekeekhai. Nto mulopwana mukina, okathi miyo olavulanne aka, vakhala wira kaahitoko okumanana namirima miili, ole aari mmosa a yawo. Mulopwan'ole aari vekeekhai. . . Amwaar'awe yaari muthiyana a maihi ootteela, ni aahikhala aana ni. . . aana anli ni muthiyana mmosa a maihi ooriipa. Nto miyo kuupuwela, "Vano, vano exeni? Ela eri va, miyo ki—miyo kiri othene ootikinhiwa. Miyo ki namulipiheryo; ehaana okhala Masu, ahiso ela kehiyo yooloka. Nto va eri Erooho ye, mmosa ooruma, ntoko sothene miyo sinsuwel'aka, ooloka; nave mukina khaari ooloka hata vakhani; nto Erooho yaakhuruwelaka owanli. Vano, eniweryaneya sai okhala siiso?" Miyo, eyo yaahikitikiniha.

¹⁴ Iyakha piili ohoolo waya, miyo kaamulompa mmuttuphani mwemmo waarowak'aka olompa-mo. Naahikhala ntthupi mmuttuphani, nto oxekuwa omosa kikhuma, kimupweha Bibilia aka vanttoroni, nto etheku khimukhunla mwa aHeperi, kapiitulu 6. Yeyo ehimnye, wira mahiku ookiserya, moota yaarow'aya okhala hiyo nahiyaru Ekeekhai ni ohokoloxeriwa-tho orukunuxa murima, khuvo-tho mukuttho mukina wa etampi, ni moota miiwa ni malaxi oonanara, seiyo saakhuveela okhoottiwa, emalelo aya okhanle opahiwa; masi epula enoorwa vatthayani, kweekwe, wira enaanihe, wira etthokihe; masi miiwa ni malaxi oonanara saamurowa okhoottiwa, masi etriku yaamurowa othukumanyiwa. Nto miyo kuupuwela, "Vano, alakela ela etheku paahi ekhunlale vaavo." Vano, kimupweha

Bibilia emara ekina. Nto miyo kuupuwela, “Vano, vano miyo ki. . .” Nto va enoorwa etheku khimukhunla. Eyo yaahiiraneva vara vararu. Nto miyo kuupuwela, “Ahe, vano, ti yootikiniha.”

¹⁵ Nto vo okathi ovenyaly'aka, nto kuupuwela, “Pwiya, mwaha wa xeni Nyuwo mwaarow'anyu omukhunla Bibilia wira kisome eyo, miyo. . .okathi ophiyenry'aka eyo, ‘miiwa ni malaxi oonanara, yawo anikhuveela okhoottiwa, emalelo aya okhanle opahiwa?’” Miyo kuupuwela, “Mwaha wa xeni, Nyuwo mwaarow'anyu okikhunlela yeyo vale?” Nto okathi waaweh'aka nno ni nno. . .

¹⁶ Vano, soowoona iya s'ekeekhai sinoorwa hata muhitthokihenrye. Owo ti Muluku paahi. Munnona? Miyo kaahirukunuwa koono elapo yaarukurerya ohoolo waka, ni kaahoono wira yothene yaari yoolimmwa. Aahikhala mulopwana mmosa aawanre ikuwo sootteela, aakhumme aalaka etriku. Nto okathi okhumme awe khirukunuwa vakompa v'elapo; khurwa mulopwana mmosa, aakhala ntoko owoopiha, owo aawanre ikuwo sooriipa, nto aala ipyo sa malaxi oonanara mapuro othene. Iyo soopiili khinnuwa vamosa. Nto okathi sikhumelanly'aya, soopiili saahivoliwa ntthona, okhala wira yaanithunaneya epula. Nto khula emosa yaakhala ntoko yaamulompa, ni muru aya mukhaani wuurammeene, “Pwiya, muveleelihe epula, muveleelihe epula.” Vano meeku maalupale yaahikhumelela, nto epula khirupela soopiili. Okathi epula erupaly'aya, etriku yamukhaani khuyenya khipacerya wira, “Attotopeliwe Apwiya! Attotopeliwe Apwiya!” Nave malaxi oonanara khuyenya siiso epante emosaru, khwira, “Attotopeliwe Apwiya! Attotopeliwe Apwiya!”

¹⁷ Vano yoowoona yaahitaphuleliwa: Epula ennimurupela naxariya ni ootakhala. Erooho emosaru pooti okhuruwela vamuthukumanoni, nto atthu othene khiyatthapela yeyo: anamirima miili, aKristu, n'atthu othene vamosa. Vekeekhai ti yeyo. Masi exeni iyo? Ni mihokorokho saya awo annisuweliwa. Munnona? Ti enamuna emosa paahi enweryaney'aya osuweliwa.

¹⁸ Nto nyuwo munnona eyo vano, opacerya marupi a mutakhwani, wala etriku ya mutakhwani ni enuku imara sikina ennitakiherya enuku yooloka, ya vate, yoolattanexa mpakha yaarow'aya omootooha ole Oothanliwa. Miyo kinoona wira hiyo ninkhala okathi wootthuneya, okathi itthu iya saatthuney'aya olaleeriwa ni ohimmwa.

¹⁹ Nkawehani eversikulu 41, soopiili nave soolattana, soolattana mahiku ookiserya mpakha Owo ohiira. . .Owo khaarowa olipa n'ikereja emosa emosa wira aavalaanye, wira, aMetotista wala aPatista, ahiso aPentekosite, wira aavalaanye. Owo ohimye wira, “Owo onaaruma malaikha Awe wira yaavalaanye.” Nlaikha nnimoorwa wira nruuhe ovalaanya, ovalaanyana wa ekeekhai ni yoovonyeya. Ni khavo onwerya

wira eyo woohikhala Nlaikha n'Apwiya. Owo ti Ole onrowa ohimya ele eri y'ekeekhai ni ele eri yoovonyeya. Muluku ohimye wira Owo onimwaaruma malaikha Awe okathi wookiserya. Kahi malaikha akhuruwelaka *va*, masi malaikha okathi wookiserya, ni yaamuthukumanya mavisu. Hiyo noosuwela wira eyo orwa w'okathi w'ohepha vano. Vano, *nlaikha* vekeekhai nintaphuleliwa ntoko "namitthaka." Ni hiyo ninnoona wira ari malaikha mathanu na manli a ikereja thanu na piili, nto vano. . . nnari, okathi wa ikereja.

²⁰ Nkaaweheni ale Owo aahimye awe wira yaari alipa-oowaala, nave-tho wira epyo yaari exeni. Mmosa, mulipa-oowaala aari Yowo, Mwana a Muluku, Yowo aaronwe aalaka Epyo. Nto nwanani khurwa ottuli Wawe, yowo aari xetwani, khwaala epyo y'ovirikanyiha, ottuli wo waaliwa w'Epyo yekeekhai. Vano, axipatthani, eyo eniiraneya woovirani w'okathi opacerya okathi hiyo okhalanne ahu olumwenku. Vekeekhai. Okhuma wopaceryani, yaahipacerya etthu emosaru.

²¹ Vano Owo ohimye wira, "Epyo ya Muluku, Masu a Muluku." Yesu oohimya, nipuro nno, wira "Masu t'ari Epyo." Ni khula epyo enookhumiherya ntoko muxovo aya. Nto vano vaari wira muKristu, aana a Muluku, aana a m'Omwenehi ahaana okhala Epyo ya Muluku, nto awo ahaana okhala Masu a Muluku, Masu a Muluku owooniheriwa okathi awo anikhal'aya, wa Epyo yaalaiherya okathi yowo. Muluku aahivaherya Masu Awe wopaceryani, ni khula okathi onikhalana Epyo aya, okathi aya, anatiri aya.

²² Vano, okathi Nowe orwiy'awe, nave owo aari Epyo ya Muluku, Masu a Muluku a okathi yole.

²³ Okathi Moise orwiy'awe, khivaaweryaneyya owo orwa ni mutthaka wa Nowe, khawarowa ovara etthu, okhala wira owo aari Epyo ya Muluku okathi ule.

²⁴ Nto okathi Kristu orwiy'awe, khivaaweryaneyya Owo orwa n'ukathi wa Nowe wala Moise; waari okathi Awe, wira harusi arupale amuyare Mwana, nto Owo aarowa okhala Mesiya.

²⁵ Vano, hiyo nookhala okathi wa Lutero, okathi wa Wesley (Okathi wa Metotista), okathi wothene ovinre, ni okathi wa Pentekosite, ni khula okathi onnivaheriwa natiri a Masu. Ni athu a okathi yowo, anooniherya Masu yawo a natiri, t'ari Epyo y'okathi yowo, sintoko ele Yesu ohimaly'awe va, "Awo t'aana a m'Omwenehi." Ti yeyo. Wiisooniherya wa Eroho Yowarya evaraka muteko mw'ana Awe t'ari Epyo ya m'Omwenehi okathi yowo.

²⁶ Nkawehani, naari nthakathaka, nwanani, Satana, yowo aanle ohiiwanana, ahiso e—ahiso epyo y'ovirikanyiha, owo t'aatthenke mwaha wo wira etthu ila yootakhalexa. Satana aanle epyo awe okhuma wopaceryani, okathi Muluku aaheny'awe mmiso Awe w'athu vasulu v'elapo. Adamu, vekeekhai,

aanisuwela wira waahikhala o—osuwela wa ekeekhai, ni yooreera ni yoonanara, ni owo iira ahinatthi ophiyerya yeyo nlelo.

27 Masi hiyo ninoona wira, Muluku aavan'he ana Awe Masu Awe wira okhale Mwakiheryo aya. Wawaya...Hiyo khanrina Mwakiheryo mukina woovikana Masu a Muluku. Owo ti Mwakiheryo ahu. Khasikhanle misika, hata ntthyawelo, hata mapuro owiipitha-mo, hata mArizona wala maCalifornia, hata nipuro pi nipuro; ori Mwakiheryo mmosa paahi hiyo nrin'ahu, nto owo ti Masu. Nto Nsu naahiipaka erutthu khukhala ni hiyo, yowo ori Kristu Yesu. Owo paahi t'ori Mwakiheryo ahu. Nikhalaka mwa Yowo, hiyo nnikhala oolipa.

28 Nnakhala tu etampi khonihimyaniwa mulipa-oowaamini eekeekhai. Nyuwo mwaanisuwela eyo? Ole oniyariwa wa Muluku, khaniira etampi, khivanweryaneya owo wira etampi. Munnona? Eyo khonihimmwa nnakhala. Vano, David ohimye wira, "Ooreeriwa t'ule Muluku ohinimuhimyan'awe etampi." Nyuwo mwakhalaru mwa Kristu, khamuntthuna wira etampi. "Mulipa-ookokhorela, amalaru ovuluxiwa, kharina tho muupuwelo wa etampi," nyuwo khamuntthuna eyo. Vano, vamaithoni w'olumwenku, nyuwo pooti okhala natampi; masi, wa Muluku, khamuhiyo, okhala wira nyuwo muri mwa Kristu. Vaniweryaneya sai nyuwo okhala natampi okathi munikhal'anyu mwa Ole ohi natampi, ni Muluku onimoona Ole nyuwo mury'anyu mwa Yowo?

29 Vano okathi ula w'ohepha. Wopaceryani, okathi Muluku aanly'awe Epyo Awe mulaponi khuhela Yeyo mmurimani mwa ana Awe, amusi Awe, wira asukeke Masu ale, awo yaari mwakiheryo aya mmose-ene, osuka Masu ale! Va khurwa nwanani khupwexa mukaano owo, mwaha wo waala epyo y'ovirikanyiha, yoovirikana ni Masu a Muluku. Yakhala wira waari ovirikanyiha wopaceryani, nlelo ti yeyo. Etthu pitthu enrowa wuncererya etthu pitthu mwa Masu a Muluku, eyo nlelo epyo y'ovirikanyiha! Miyo khenikicala otthu enikhum'aya-wo, vaari wira ti ya mutthenkeso, yaari wira enikhuma mapuro a onatoropa, yaari wira ti ya ikuru sa poliitika, etthu pitthu evirikanne ni Masu a Muluku, epyo y'ovirikanyiha.

30 Mutthu aavenyaka ni wira wira owo mulaleyi a Ehapari yooreera, ni wira "mahiku a miiriirya aavira," eyo epyo y'ovirikanyiha. Mutthu aavenyaka wira owo murumeyi, pastore a mukereja ya nipuro nno, ni khuhiyaamini wira Yesu Kristu mmosaru mwa khula etthu yaamukhaani (ohiya mw'erutthu), mmosaru nsana, olelo, ni mahiku othene, eyo epyo y'ovirikanyiha. Owo aahimyaka wira "miiriirya ni okathi w'arummwa woovira," eyo epyo y'ovirikanyiha. Atthu yiiraka, "Khekhanle etthu iyo ntoko ovonihiwa ni Muluku," eyo epyo y'ovirikanyiha. Ni olumwenku khoreere seiyo. Eyo enookhitta ni ophunyaka etriku.

³¹ Hiyo ninniweha wira mulipa-oowaala oopacerya a epyo y'ovirikanyiha aathittiwe “xetwani,” ni hiyo noosuwela wira yaari, mwa Maphattuwelo 1. Vano hiyo ninniphwanya wira, ni va mu—muLivuruni mwa Matewu, kapitulu 13, Yesu ontthitta khula ovirikanyiha wa Masu Awe ntoko okhala “xetwani.” Ni 1956 ula, etthu p'itthu enaala ovirikanyiha, yoovirikana ni Masu oolempwa a Muluku, wala eniruuha otaphulela waya mmansaya mwa Yawo, epyo y'ovirikanyiha. Muluku khanrowa ottittimiha. Owo khaniira. Awo khantakaniheya. Awo vekeekhai khantakaniheya. Awo ari ntoko enuku y'evai; eyo khentakaniheya ni hat'etthu ekina, khivanweryaneya otakanxa eyo, eyo ehaana okhala etthu yooloka. Epyo y'ovirikanyiha!

³² Vano hiyo ninniphwanya, okathi Muluku aalaly'awe Epyo Awe omatta w'oEdeni, hiyo ninnoona wira eyo yaamuyanre Abeli. Masi okathi Satana aalaly'awe epyo awe y'ovirikanyiha, yaamuyanre Kayini. Emosa yaamuyanre naxariya; emosa yaamuyanre mutakhali. Okhala wira Hawa ole aaiwelenle nuulumo n'ovirikanyiha, noovirikana ni Masu a Muluku, nto eyo khupacerya omuphirikeiha poola a etampi vaavale vene, nave noophirikeya okhuma okathi yole. Ni hiyo khaninkhalakhala nikumiheryaka ela ota mpakha malaikha arwe wira avalaanye etthu iyo, ni Muluku aaroihe ana Awe mOmweneni, nto nthakathaka ninrowa opahiwa. Nkawehani miri iye miili.

³³ Vaakhanle wira hiyo naahikhalana okathi tho wa mwaha ola, masi wira niphwanye mapuro maalupalex, wira nikele naanaanoru naavekelele aretta minutu vakhani sinttarelana.

³⁴ Nkawehani, ipyo saya saahinnuwa vamosa vekeekhai ntoko Muluku sihimmy'awe va nave ekapitulu 13, ya yoosoma ahu ohiy'ula, ya Matewu, “Muhiye sinnuweke vamosa.” Vano, Kayini aahrowa elapo y'oNodi, khumphwanya muthiyana, khimuthela; vano Abeli aarimwiiviwa, nto Muluku khunvenxa Sethi wira aranttele nipuro nawe. Nto maloko khupacerya wetta arowaka, eriyari y'ekeekhai ni yoovonyeya. Vano, hiyo ninniweha wira awo yaahithukumana, khula mmosa a yawo, okathi p'ukathi, ni Muluku aahaana o...Awo yaahitakhala mpakha Muluku ophiyererya ohonona.

³⁵ Masi vookiserya awo yaahikhumelela mpakha ipyo iyo soopiili, epyo y'ovirikanyiha ni Epyo ya Muluku, khuthapuluxa miru saya s'ekeekhai, nto eyo yaamalenge mwa Yuta Iskariyoti ni mwa Yesu Kristu. Maana, Owo aari Epyo ya Muluku, Owo aari epacerele ya soopattuxiwa sa Muluku, Owo khaari hat'etthu woohikhala Muluku. Vano Yuta Iskariyoti aayariwe mwana a mopweteyani, aakhumme omooroni, khutthikela omooroni. Yesu Kristu aari Mwana a Muluku, Masu a Muluku owooniheriwa. Yuta Iskariyoti, mwa ovirikanyiha wawe, aari epyo ya xetwani, aarwiye mulaponi, wira awokeke; vekeekhai ntoko owo saary'awe wopaceryani, Kayini, atithi awe a khalai.

³⁶ Yuta aamuthweela paahi mukereja. Owo khaari naxariya vekeekhai. Owo vekeekhai khaamini; owo khaakhalakhala amulupathhaka Yesu. Masi, moone, owo aanle epyo ele y'ovirikanyiha. Owo uupuwela wira aamuwerya okhalana opatthani n'ulumwenku, mamoni, nave tho okhalana opatthani ni Yesu, masi waahixa vanci-ene wira iire etthu p'itthu mwaha wa yeyo. Vaphiyaly'aya okathi w'okhwa, okathi iiraly'awe etthu ila yootakhala, owo aahitupha mukaano onivalaanyiha orowa ohoolo ni otthikela ottuli. Owo aahaana okela ohoolo ephiro aaronwe awe, ntoko namawoka. Owo aanle epyo y'ovirikanyiha, owo aatthunne ophwanya mureerelo ni mitthenkeso iye suulupale sa nihiku nle, n'aFarisi n'aSaduki. Ni uupuwenle wira aamuphwanya musurukhu, ni aamukhala oosuweliwa eriyari y'atthu. Vaari wira eyo kheniwiirihani atthu anci-ene okela m'ovirikanyihani mwemmo, yeereryaka ophwanya mureerelo ni mutthu! Nrowe niphwanye mureerelo ni Muluku, kahi ni mutthu. Masi ti yeyo Yuta iiraly'awe okathi mivirikanyihyo iya saamalenly'aya mwa yowo.

³⁷ Nto hiyo noosuwela wira Yesu aari Masu, Yohani Owarya 1, ohimnye wira, "Wopaceryani naari Nsu, ni Nsu naari ni Muluku, ni Nsu naari Muluku. Vano Nsu naahiipaka erutthu khukhala va ni hiyo." Nto, Masu Epyo, nto Epyo khwiipaka erutthu khukhala ni hiyo.

³⁸ Vaari wira Yuta aari epyo ya nwanani ni y'ovirikanyiha, eyo nave yaahiipaka erutthu khukhala ni hiyo mwa omutthu wa Yuta Iskariyoti. Owo khaatonko okhalana wamini, wooloka ni w'ekeekhai. Owo aarina etthu *uupuwel'awe* wira waari waminii. Yookhala etthu iyo ntoko wamini; ni wamini wo wiipaka.

³⁹ Nto wamini w'ekeekhai wa Muluku onoomwaamini Muluku, ni Muluku ti Masu, khonkhalakhala wuncereryaka hat'etthu mwa Yawo. Bibilia onnihimeerya wira nancereryaru nuulumo nimosa, wala okumiha-mo Nuulumo nimosa, mpantte ahu onookumihiwa muLivuruni mwa Ekumi, Wisuupulula 22:18, ekapitulu yookiserya y'omaliherya.

⁴⁰ Mupacerelo woopacerya, Elivuru yoopacerya ya Bibilia, Muluku aahimeenrye wira ahionone hata Nuulumo nimosa na Yeyo, "khula Nuulumo nihaana osukiwa," awo yaahaana okhala ni Masu yawo. Yesu, eriyari ya Elivuru, aahirwa kuhimya yeyo mwa okathi Awe, khwira, "Mutthu khanikhala mukumi ni yolya paahi, masi ni Masu othene ani-anikhuma mwaano mwa Muluku." Nto okathi wookiserya wa Wisuupulula, onnihimeerya, wira, "Akhala ole onikumihha Nuulumo nimosa muLivuruni, wala wuncererya nuulumo nimosa mwa Yawo, mpantte awe onookumihiwa muLivuruni mwa Ekumi."

⁴¹ Tivo khivanweryaneya okhala etthu yoohikhala ekeekhai, Masu a Muluku ooloka paahi, ni oohihononiwa! Awo ti aana a Muluku, alopwana n'athiyana, ale ahियariwe n'utthuna wa

mutthu, wala mwaha w'ovahana mukhono, wala muthinto mmosa w'opatiiso; masi ooyariwa mwa Eroho ya Muluku, ni Eroho Yowarya, ni Masu yiisooniheryaka Mmansaya mwa yawo. Eyo ti Epyo yooloka ya Muluku!

⁴² Nwanani oniitakanxa mukereja n'ukhala oottharihela sana eyaminelo wala etthu. Masi eyo kehiyo...Eyo ovirikanyiha, etthu p'itthu enivolowela muro owo wa Ekeekhai yooloka ya Masu a Muluku.

⁴³ Nto hiyo ninsuwela sai? Hiyo nniira, "Ahe, awo, nyuwo muhaana ehakhi y'otaphulela Yela?" Nnari, mulopwana! Khavo mutthu orina ehakhi y'otaphulela Masu a Muluku. Owo ti Mutaphuleli awe Mwanene. Owo onoohimya ela, vano Owo onimwiira, eyo p'utaphulela waya. Okathi Owo aahimmy'awe Yeyo, vano Owo onoomaliherya Yeyo, eyo p'utaphuleliwa wa Yeyo. Etthu p'itthu enivirikana ni Masu a Muluku ovirikanyiha! Vekeekhai!

⁴⁴ Vano, ntoko miyo sinihimyak'aka, Yuta khaarina wamini w'ekeekhai. Owo aarina wamini wo wiipaka. Owo aarina wa—wamini owo uupuwel'awe wira ole aari Mwana a Muluku, masi khaasuwela wira aari Mwana a Muluku. Owo khaarowa wira eyo. Nto mutthu ohinthokererya Masu a Muluku okhala Ekeekhai, owo orina wamini wo wiipaka. Murumeyi a Muluku eekeekhai onoovarela Masu ala.

⁴⁵ Ohiyu kamosa kamosa ovinre, murumeyi mmosa, a w'Arizona, a exikola emosa, yuulupale ni yuusuweliwa epooma ela, aahikirweela khwira, "Miyo—miyo kintthuna koolakiheryeni mwaha w'etthu emosa" (Miyo khwira...) "mwakhalanaru okathi."

Miyo khwira, "Ola p'ukathi wooreerexa miyo onsuwel'aka. Murwe."

⁴⁶ Nto vano owo khirwa, owo khwira, "Mwenye Branham, nyuwo muneererya...miyo kookupali wira nyuwo mwa ooreera murima ni mwa naxariya, masi nyuwo muneererya okeliha mulaponi Mwixuttiho w'arummwa." Nto khwira, "Okathi w'arummwa omanle n'arummwa."

⁴⁷ Miyo khwira, "Etthu yoopacerya miyo kaatthun'aka wookohani, munn'aka, nyuwo munaamini wira khula Masu a Muluku t'owuupululiwa?"

Owo khwira, "Ayo, mulopwana, miyo vekeekhai kinaamini."

⁴⁸ Miyo khwira, "Vano, mwaamukooniha muhina mwa Masu vatthu okathi w'arummwa omalal'yaya? Vano, nyuwo mukoonihe vatthu vary'aya yeyo, miyo kinimwaamini ni nyuwo." Nto miyo khwira, "Mulipa-olempo okathi w'arummwa, yowo aarina ihulelo sa mOmweneeni, nihiku na Pentekosite vapaceriw'aya okathi w'arummwa, awo yiirale, 'Alopwana n'axinna, niireke exeni wira noopowe?" Owo khwira,

'Murukunuxe murima, khula mmosa a nyuwo, mupatisiwe ni Nsina na Yesu Kristu, wira muleveleliwe itampi, nto munimwaakhela yoovaha ya Eroho Yowarya, okhala wira natiri t'awinyu ni t'awaya an'inyu, n'ale ari ottaiwene, othene ale Apwiya Muluku ahu antthun'aya owiihana.' Vano, eniweryaneya sai Masu wiivaanyiha Mmansaya?"

Mulupwan'owo khwira, "Miyo nkireere oriiriwa ohiy'ula."

Miyo khwira, "Miyo kinoona wira ti siiso, nave." Munnona?

⁴⁹ Vano nyuwo mukileele, Muluku nlelo onimwiihana? Vaari wira Muluku nlelo onimwiihana, nto okathi w'arummwa nlelo ti wookhala. Vekeekhai! Othene ale Apwiya Muluku ahu antthun'aya owiihana, ankhalakhal'aya awiihanaka, anrow'aya okhalakhala awiihanaka, othene ale Awo anrow'aya owiihana, owo nlelo onrowa okhala okathi w'arummwa, maana Yesu Kristu mmosaru nsana, olelo, ni mahiku othene.

⁵⁰ Vano, hiyo ninnoona olelo wira ovirikanyiha nno onikhala woowaaliwa khula okathi. Vaari wira waaniweryaneya okuxa yeyo minutu muloko wala muloko ni thanu sintharelana, miyo kaamwiira, masi khivanweryaneya. Mwa ovira w'okathi... Hiyo othene nri, anci-ene a hiyo ninnimusoma Bibilia. Nto vano ntoko okathi Yesu aarwiiye awe, nto Owo khuphwanya ovirikanyiha weiwo, ovirikana. Owo aari Masu owooniheriwa, Owo aari otaphulela wa Muluku wa Masu, okhala wira Owo iirale, "Mwaavayye Solempwa, maana mwa Seiyo nyuwo munuupuwela okhalana Ekumi Ehinimala, nto ti seiyo sinikikhalela Miyo onamoona." Eyo eri vo. Owo—owo aari otaphulela wa Masu. Ni khula mwana a Muluku mulopwana wala muthiyana ooyariwa vasya a okathi ula p'utaphuleliwa wa Masu. Nyuwo mwa ipaphelo soolempwa, sinisommwa n'atthu othene. Ayo.

⁵¹ Nkawehani, Owo ohimye wira, "Annikikokhorela Miyo mahala, yiixuttihaka nvirikanyiho ntoko Mwiixuttiho. Annikikokhorela Miyo mahala, yiixuttihaka ntoko Mwiixuttiho nvirikanyiho, mwiiixuttiho wa mutthu, iyaminelo sa mutthu, yiixuttihaka wira awo Masu a Muluku, okathi eyo ehiri'aya nata ni Masu a Muluku."

⁵² Nwehe, khula okathi yaahikumiherya yoohepha yeyo, khula okathi eniira yeyo, ni wawihu khonihiyeya. Hiyo nrina etthu emosaru, ni okathi w'ohesha muulupalexa ovikana mahiku othene vamosa, maana ola t'imalelo ya wahala a olumwenku. Ola ti nvirikanyiho muulupale otonko okhalakhala mulaponi, ori mulaponi olelo. Nvirikanyiho mahiku makina waahaapurula mpakha ottai wa Muluku mukumi ni eekeekhai, mpakha wa a muluku a ithiru. Olelo, Yesu oohimya mwa Matewu 24:24 wira saarowa okhala soolattana, saarow'aya owoototha ale Ootthommwa vaari wira vaaniweryaneya. Nvirikanyiho xeni! Oh, ti w'olavilavi. Satana ori eriyari y'atthu, ni owo ti

teoloko, Totori a Divindad, oniwery'awe wiixuttiha Masu ale ntoko oratta-ene. Yesu ohimnye siiso. Masi mmuwehe paahi, onookhumelela nipuro nno. Khwira, "Ahe, vano, eyo khayaari ya yela." Oh, ayo, ti yeyo, nave, moone, okhala wira Muluku aahimnye wira yaari yeyo.

⁵³ Nkawehani etthu yiiraly'aya. Nvirikanyiho yowo waahiruuha oviruwa wa Muluku mahiku a Nowe, okathi Muluku aamurumme awe profeta Awe ni khulaleerya ntoko mooro woovarela, khuwiihana atthu wira arukunuxe murima, vano nvirikanyiho khupwina. Vano exeni Satana iiraly'awe? Veekkhai khurwa ottuli, mwa Khami, nto khupacerya waala tho. Eyo ekeekhai tu.

⁵⁴ Ohoolo waya khurwa Moise, profeta muulupale, wira aaruuhe aana a Isarayeli aakumihaka mothakoni. Exeni yiiranan'ye? Moise, profeta muulupale a Muluku, aaruuhelaka Ekeekhai yoomalela, Ekeekhai yoolipiheriwa. Owo aakumanne ni Muluku. Muluku khooniherya wira owo aahikumana ni Yowo. Okhala wira atthu ale khalai wu, anamukuttho ale, ni awo yaahikkhalana itiini saya, maira aya, mairelo aya ni itthu sothene, masi Moise khukhala siiso olipiheriwa w'otaphuleliwa wa Masu. Muhiliyale yeyo! Moise aari otaphuleliwa wa Muluku wa natiri Awe. Owo aahimnye wira aamwiira; owo aari otaphulela wa Muluku.

⁵⁵ Exeni yiiranan'ye? Ekereja khupecerya okhuma wEjitu, yeettaly'aya mahiku vakhani, nto exeni yiiranan'ye? Satana khikhumelela ni nvirikanyiho awe mwa mutthu, Kayini a neenli, yowo aari Balaamu, nto khwaala nvirikanyiho eriyari aya. Hiyo noosuwela wira eyo ekeekhaii. Wira Balaamu, mwiixuttiho wa Balaamu, wira "hiyo othene na mmosaru, hiyo nnimurumeela Muluku mmosaru yowo onimurumeel'anyu," mwa ele yaatthuneya, owo aahikkhalana exariya, okhala wira owo aanivaha mukuttho yowo Muluku aavah'awe; ipwittipwitthi thanu na piili, amwaanyompe athanu n'anli vasulu v'altari athanu n'anli, ni aamuvekela Muluku mmosaru tu v'orattavo ntoko Moise siirak'awe ohitto iwe mothakoni, veekkhai voolikana. Masi awo khayaari amosaru! Yooniheryaka wa hiyo etthu yaarowa wiiraneya. Aaphwanyaneya vale, emara ekina, Kayini owooniheriwa mwa...mutthu ula Balaamu. Ni vale aaphwanyaneya Muluku owooniheriwa mwa omutthu wa Moise, ataphulelaka Masu Awe muhina mwa mutthu, aikhalihaka Mmansawe oosuweliwa, natiri Awe, muhina mwa mutthu. Nto nvirikanyiho khikhumelela.

⁵⁶ Vano yeyo aahiira okathi wa Yuta, owo aahikhumelela ni nvirikanyiho awe.

⁵⁷ Nto, muupuwele, etampi ila atthu ale yaaminni aya, wira "hiyo othene nri mmosaru, hiyo nimmukokhorela Muluku mmosaru, hiyo naahaana wira mpantta wa ekereja emosaru, hiyo

naahaana okhala nloko nimosaru,” etampi ile khiyakhalkhanle aleveliwaka Isarayeli! Yesu oohimya, Mwanene, “Othene aya ahookhwaso!”

⁵⁸ Awo yaahipweteya, othene waahiya araru a yawo. Awo t'ale yaakhalelele nthiti ni yaamwaaminni natiri. Okathi ole ootetetheya iiraly'awe, “Hiyo khaninwerya okuxa muttethe, ni ti yoorika wa hiyo,” ni sikina, Kalebi ni Yoxuwa khwaamaaliha athu, khwira, “Hiyo ninniweryaxa okuxa, okhala wira Muluku t'onilaihenrye hiyo! Miyo khenikicala wira nwanani t'uvi!”

⁵⁹ Ni hiyo nlelo pooti olaleerya ovonihiwa ni Muluku, ni opatiiso wa Eroho Yowarya, ni nlelo okhalana owerya wa Muluku wira onivalaanyihe hiyo ni itthu sa molumwenkuni. Muluku ohimye siiso! Okathi w'arummwa khonamale, ni khonimala, owo onoorowa.

⁶⁰ Vano, hiyo ninnimuphwanya mulipa-oowaala nvirikanyiho mmosaru yowo a khalai. Ni muupuwele, etampi ile khenaleleveliweke. Vano, munna, yakhala wira khenaleleveliweke okathi ule, ankhi vano okathi e—epyo y'ekeekhai ya mahiku othene enithukuman'aya vamosa?

⁶¹ Nkawehani etthu ila yuulupale Balaamu iiraly'awe, yaahirowa ohoolo ni ohoolo, ni wookiseryani emalenle n'urwa wa—wa Yuta Iskariyoti, ni Yesu. Yaari exeni ila? Yuta ni Yesu yaari vekeekhai ethoonyeryo ya Kayini ni Abeli. Maana, ntoko Yuta saary'awe natiini, siiso aari Kayini natiini. Kayini aahimuteka altari, owo aahihela mukuttho, aahimukokhorela Muluku, owo aari naxariya mwa yela siiso ntoko saary'awe mukina. Masi, nyuwo moone, owo khaarina muupululo w'etthu yaari Masu. Owo uupuwela wira waari mwaha wo wira Adamu ni Hawa yaakhuuranse masa wala muhokorokho mukina. Nto Kayini...Abeli, ni muupululo, aahisuwela wira yaari yoovonyeya; yaari ephome yaakhumihanse, nto owo aamuvan'he mwapwittipwitthi. Ni Muluku aahikhalela onamoona wira mukuttho awe waari wooloka. Vano owo khukhalana nrima khithhuna omwiiva munn'awe. Nto siiso owo omwiivaly'awe munn'awe vasulu v'altari vaavo mukuttho awe vaakhwi'y'aya, mwapwittipwitthi aakhwiye vasulu v'altari, siiso Yuta Iskariyoti aamulupantthe Yesu Kristu vasulu v'altari a Muluku, ni khumwiiva Yowo ntoko Kayini aamwiivaly'awe Abeli. Okhala wira, Kayini aari epyo y'ovirikanyiha.

⁶² Ni siiso aari Balaamu, profeta ooliviwa, mutthu aatthuneya osuwela oratta-ene. Ni Muluku aahimulopola ni miiriirya ni sootikiniha, hata puuru alavulaka ni ilavulelo soohisuwanyeya, nnakhala vo owo aahithikela arowaka siiso. Owo aayareliwe wira akhale mu—mulipa-oowaala nvirikanyiho.

⁶³ Nto vaari wira Yesu oohimya wira okathi ula onimalela ni nvirikanyiho muulupalexa ohinatoko okhala, okathi wa ekereja ya Lawotiseya, yookuttihiwa, yeyo emuhenle ota wa ekereja,

eniweryaneya sai eyo okhala etthu ekina woohikhala yowo: Nvirikanyiho! Vekeekhai, ti yowo. Enimalela okathi yowo.

Nto aari Kayini ni Abeli emara ekina oKalvario.

⁶⁴ Vano nwehe, sintoko kweekwe, Yesu amalakaru orowa, oronwe Wirimu, Eroho Yowarya khuveleelihiwa. Eyo yaari Epyo, Mulipa-Onivaha Ekumi Masu, ntoko hiyo silavunly'ahu nsana ohiyu. Ela t'Ile enikhaliha makumi Masu. *Okhaliha makumi* enihimya “oruuhele Ekumi.” Eroho Yowarya yooloka eniruuhele Ekumi paahi Masu wira Ela ti yeyo. Eyo kheniruuhele Ekumi eyaminelo, khivanweryaneya, okhala wira Eyo kehiyo hata epantte y'eyaminelo. Eyo Ekumii ya Masu a Muluku, maana Owo Mulukuu. Munnona? Nto Eyo enikhaliha ekumi Erutthu yeyo.

⁶⁵ Vano nwehe, moota awo siiraly'aya. Nto, ni Bibilia oohimya, ni—ni Yohani aahahimeerya aana awe khwira, “An'aka, nyuwo muhiwa mwaha wa nwanani a Kristu yoowo aari wira arwe mulaponi,” khwira, “yowo ori mulaponi, onivara muteko mwa aana oohiwelela.” Vano, eyo yiiranan'ye muhina wa iyakha soophiyaka miloko miraru vaamanly'aya orwa Eroho Yowarya. Hiyo ninniphwanya wira, okathi Eroho Yowarya erwii'aya, Epyo y'ekeekhai, Mulipa-Onivaha Ekumi Epyo eekeekhai, vano va onikela nvirikanyiho yowo emara ekina. Nto nwehe, eyo yaahirowa ohooolo. Eyo yaarina . . .

⁶⁶ Masu eekeekhai yaahilipiheriwa, maprofeta ale a khalai yaahilipiherya Masu a Muluku okhala Ekeekhai okathi waakhw'aya. Akhala mutthu otonko osoma *Muthukumano w'Onicea*, ahiso *Muthukumano Woopacerya w'Onicea*, mahiku ale muloko ni mathanu a politika ooyeehi ephome, okathi nikhuru nle n'aRoma ohitto iwe yaatthunne aya opuherya ni opaka muromolelo wa ekereja yeyo. Maprofeta yaahirwa, awanreene isapala sa ipwittipwitthi, aly'aka malaxi, ni khulipa mwaha wa Masu yawo! Masi eyo yinre exeni? Yaahaana okhala ntoko Kayini, yaahaana okhala ntoko Abeli, mmosa aahaana okhwa. Vekeekhai, yaahaana. Ni Masu yaahihiya ovara Waya murima eriyari y'atthu, nto awo othene yaahikumihamo ni mwaathanle Masu eekeekhai khikuxa makano a nvirikanyiho a ekereja Katolika yoopacerya. Awo khimuncereryamo paapa, khimuncereryamo pixipu, khincereryamo *ela, ele, ni ekina*. Khikumihamo yoohimya yeekeekhai ya Pedru, ni ya—ya—ya Maria, ni—ni yothehe ekina; khupaka ithiru, ni khuhipaka hat'etthu woohikhala niira n'epakau mwa etiini eniihaniwa oKristu. Yaari exeni? Epyo y'ovirikanyiha! Ni yoothokihwiwa, yoothokihwiwa, emara yoopacerya mulaponi, ekereja. Yaari exeni? Epyo yeeyo y'ovirikanyiha yaapacenyee waaliwa, eheliwaka-mo etthu, ekumihiwakamo.

⁶⁷ T'ani otonko wiiwa, mBibiliani, ohikhuura enama Namathanu? T'ani otonko wiiwa, mBibiliani, etthu p'itthu ntoko omiserya ohiya opatisa, woopwiniha? T'ani otonko

wiiwa ithu iyo, “Mutteeliwe, Maria” wala etthu siiso? T’ani otonko wiiwa etthu y’ovahuwa nno wa maProtestante ala, nave? Mwaapu khonwerya wiihana epirikha okhala yoonuna. Khweli! Vekeekhai, ole otthenke ni yaamukhani t’ottheke mwa yothene! T’ani otonko wiiwa Muluku avaraka muteko ni mutthenkeso? Mukoonihe emara emosa emosa etonko wiitthokiha khukhala ekumi. Awo yaahikhwa naanaanoru, ni khanatoko ovenya-tho! Ola okathi w’etthu wiiraneya, ola okathi wa Muluku wiitikinya. Eyo ehiiva ovariwa murima eriyari y’atthu.

⁶⁸ Etthu emosaru ehiiriwa olelo. Awo animwiiva ovariwa murima, aniira, “Oh, nikhuru nle n’amasantu oophirikeya, khekhanle hat’etthu mwa yawo.” Nto, vano, awo nvirikanyiho! Mukumane ni Masu niitho nniitho nto moone etthu Awo akhanly’aya, moone sinto Muluku onnitaphulela Masu Awe Mwanene. Muluku onniwerya ni maluku ala waatatuxa aana a Arahamu. Amen.

⁶⁹ Masu yaahilipiheriwa voomalela n’aKristu ale oopacerya, moota Muluku aavulunx’awe mwa sothene, ni iretta, ni awo yaahikhhalana maprofeta, ni awo yaanilavula ilavulelo, yaanitaphulela, n’uvaha mitthaka sooniheriwa okhala ekeekhai khula okathi. Masi mwaha wa Masu ale oolipiheriwa, atthu yaahikumiha-mo ni mwaathanle, khuthanla muromolelo. Owo ti maama a mitthenkeso sothene.

⁷⁰ Soopiili saya ti soottokottha voomalela vano. Awo aapacerya wiima ipyo emara ekina. Khukhwa, masi khuthapuluwa tho mahiku a Lutero, ntoko hiyo sinsuwel’ahu okhuma mutthaka va voosiisu w’olya. Eyo yaahithapuluwa nihiku na Lutero. Vano awo yiirale exeni? Naanaanoru vamanly’awe okhwa mulopwana ole muulupale, awo yaapanke mutthenkeso.

⁷¹ Eyo khuthapuluwa tho. Nto emara ekina mahiku a John Wesley, okathi mAnglikano ale, ni miroromelo saya sothene sihinimala ni ithu sothene yaahitthuka etthu iyo mpakha ophiyererya nipuro ekhanly’aya y’elapo yothene, nto exeni yiiranan’ye? Muluku aamuvenxale mulopwana mmosa iihaniwa John Wesley, khwiiva etthu yothene. Nto amalakarhu okhwa, owo ni Asbury n’akina, exeni yiiranan’ye? Awo khuthokiha, nto vano nyuwo muhaana mithinto sothene sa aMetotista. Numala khurwa akina, Alexander Campbell, John Smith, n’akina tho.

⁷² Vookiserya, khukhumelela Pentekosite, akhumelaka ota wa sothene iyo. Exeni yiiranan’ye nto? Awo yanitthimaka oratta-ene, exeni yookhottihenryeni? Nyuwo mutthikenle marove yawo mwaakhummanyu-mo, mutthikenle maasi yale oottakatta, mutthikenle nvirikanyiho n’upaka mitthenkeso, nyuwo mwaahaana wiisakaleliha vasulu va Masu. Nto khula okathi Muluku aavelelih’awe etthu esya, khamuwenrye waakhela. Eyo ekeekhai! Nvirikanyho tho! Nto, nwehe, ntoko sihimaly’aka nihiku nikina, nikukhu nla noopacerya

nnikhuma vamutathaarini va, nnikela mmataakhuruni mpakha mukayayani, nto entthikela tho muhina mw'erikittili, n'ukhuma. Nikukhu nle naamukhani n'etriku ninhalela olattana ni enuku ene yeyo, nto hiyo noona wira yaari yeyo, masi nyuwo mwakhunlaru, khekhanle hata enuku mme nakhala. Eyo enoosuka paahi mwemmo eninnuw'aya-mo enuku, n'iyoenookhwa nave, nto ekumi enookhuma-mo n'ukela muhina mw'enuku. Nwehe, awo aniihana ikereja saalale . . .

⁷³ Hiyo ninnoona olelo wira seiyo siniihaniwa ikereja sahu, hata aPentekosite ahu, hiyo nookhuma, hiyo khinaawenrye otteeliwa murima, naahaana opaka makhuru ahu mmansihu. Itthu sothene khikhumelela, naahaana okhalana *ela*, naahaana okhalana *ela*, naahaana okhalana nikhuru nikina. Nto mutthu ula khuyenya, khwira, "Owo onoorwa mmeekuni noottelea." Mukina oniira, "Uh-huh, Owo onoorwa vakhavaloni yoottelea." "Vaareera, ninrowa opaka makhuru manli." Moone, exeni ila? Waala nvirikanyiho! Okathi Owo onoorw'awe, enamuna p'inamuna, Owo onootaphulela Masu Awe Mwanene okathi Owo onoorw'awe. Nowe nilipelele mpakha okathi yowo. Muvare e . . . Nilavulaka mwaha wa yeyo, nyuwo nakhala khamunvara Mutthaka wa nihiku. Khula okathi muthoonyaka etthu Muluku onrow'awe wira, wala ele Owo iiralyawe, nave muhisuwelaka etthu Owo oniir'awe. Ti moota hiyo oniruuh'ahu nvirikanyiho mwemmo.

⁷⁴ Vano hiyo ninniweha wira olelo ikereja sahu, ike—ikereja sahu sothene sinaala ittheke, ni sinihepha eyuupuru. Hiyo khanrina mithukumano sa mavekelo, hiyo khanrina miteko sookokhorela saalamalenly'ahu okhalana. Mulattu aya xeni? Hiyo nootteethya mwa sothene. Nkawehani, hata ikereja sahu sa Pentekosite, soosareya athiyana oometha maihi. Eyo khayaatthuniheriwaka. Owiitho woopintariwa, yoottaka ipiriniisi mmakhopeni, inamuna sothene sa itthu soonanara; animukuxa mulopwana nno ni . . . ntoko maRicky ni sikina; oothela imara tthaaru wala xexe, ni matiyakono; oh, nvirikanyiho xeni! Ottakatta! Awo aniira sai yeyo? Muluku khaarowa okhalana eyo Mukereja Mw'awe, awo ahaana orowa mmutthenkesoni wira akele mmo. Mutthu onimoova ohimya etthu mwaha wa yeyo, 'okhala wira awo yaoomoliwa mmutthenkesoni. Muluku, anivahe atthu ahittopanyeriwe ni hat'etthu yoohikhala Muluku ni Masu Awe, anrowa ohimya Ekeekhai ya yeyo. Vekeekhai ti yeyo hiyo entthun'ahu. Exeni hiyo eniir'ahu? Naalale nvirikanyiho. Hiyo nnaala ittheke, nto vano nnihepha eyuupuru.

⁷⁵ Nwehe wira awo vano anoothukumanyiwa vamosa wira apahiwe. Nyuwo mooweha wira, Yesu ohimye wira, "Mpacerye, waathukumanya vamosa, mwaatthuke mavisi, nto muukele mavisi othene, nto Miyokoopaha." Nookhala nivisi naamukhani nnihaniwa Metotista, Patista, Prespiteriano,

Luterano, othene awo anthukumana muhina wa Mwaatano wa Ikereja sa Mulaponi. Exeni iyo? “Muthukumanye yawo toko!” Aleluya! Nyuwo mooweha? Owo onthukumanya nthakathaka toko, khususiha vari etriku, khuvalaanya seiyo: “Muthukumanye vamosa mupahe.” Othene aya ari wira apahiwe ni maphukelo a Muluku, mwaha wo waala nvirikanyiho eriyari y’atthu, itthu seiyo awo... Yooneyaka ntoko oothunku, nave akhoottaka Owerya waya, akhoottaka Masu, akhapelelaka maira a etiini, a makano kamosa kamosa mutthu okelin’hawe-mo, eereryaka okeliha mwa Masu a Muluku. Eyo khenivara etthu. Owo nvirikanyiho.

⁷⁶ Miyo kinookhuwela olelo, ntoko saary’aya, profeta muulupale a khalai, Amosi, okathi waakhuruwenly’awe muttetthe ole, khwira, “Miyo nkihiyo profeta, nnakhala mwana a profeta. Masi kharamu akhuwela, t’ani ohinoova?” Owo khwira, “Muluku alavularu, t’ani ohinihimya s’eprofeta?” Owo aahihimya olamuliwa waarweela nloko nle, khwira, “Muluku yowo munihim’y’anyu omurumeela onimootakhalihani.”

⁷⁷ Nyuwo mulepe ela, eri mufiitani, ni muupuwele. Muluku yowo... Atthu ala vano anthukumanya ohepha nno wuulupale wa—wa Mwaataano wa Ikereja sa Mulaponi, nto nyuwo munrowa okhala ookela mwemmo. Khamunwerya okhala ota wa yeyo. Weso munrowa okhala ota w’etthu ila meek’h’anyu, ahiso munookela-mo. Khenrowa okhala itthaya soohikhala etthu. Eyo enrowa okhala ekhanyero ya nxeni. Khaavo mutthu onrowa othuma wala otumiha, woohikhala ole orina ekhanyero, wala orina nvirikanyiho. Vano, mukhale ota wa yeyo! Mukhume-mo! Mutthyawe! Mukhale ota w’etthu iyo! Muluku yowo awo anihim’y’aya wira anoomurumeela onimwaatakhaliha. Muluku muulupale a ophenta ohi... .

Khwira, “Vano, Yesu olompale wira hiyo nikhale mmosaru.”

⁷⁸ Nto Owo nave tho oohimya, “Eniweryaneya sai weetta vamosa, anli weetta vamosa, ’ehikhanle wira animwiiwanana?” Owo ohimye “mmosaru,” ntoko Owo n’Atithi ary’aya Mmosaru. Nto Atithi yaari Masu, ni Owo aari Masu owooniheriwa. Owo aari “Mmosaru” n’Atithi, okhala wira Owo aari wooniheriwa wa Masu a natiri a Muluku. Ni siiso t’iry’aya olelo, wala nihiku ti nihiku nikina. Ayo, mulopwana. Muluku Mmosaru. Owo onthuna wira hiyo nikhale mmosaru.

⁷⁹ Eniweryaneya sai *ola* okhala mmosaru, *ola* nno akhoottaka oyariwa w’eharusi, n’ula ohikhoottaka, okhootta ovonihiwa ni Muluku, *n’ila*, *ele*, othene aya mw’evitika ntoko eyo? Akina wa awo hata khanimwaamini Muluku, anaamini wira Owo aari Mwana a Muluku; anaamini wira aari mwana a Yosefe, *owiihaniwa* Mwana a Muluku. Vekeekhai. Axinna maphapo a maLuterano, maZwingliano, anaamini yeyo, wira Owo aari vekeekhai mutthu ooreera murima paahi. Siensia Ookristu

ohimmye wira Owo aari profeta, mutthu pure paahi, Owo khaari Muluku. Vano, vaari wira Owo khaari Muluku, Owo nawoothe muulupale olumwenku otonko awe okhalana. Owo aari Muluku ahiso khaari hat'etthu. Owo aari Muluku! Owo aari oMuluku, Mwanene, owiipaka erutthu eriyari ahu, mwa omutthu wa Mwana a Muluku. Vekeekhai, ti yeyo Owo aary'awe.

⁸⁰ Vano hiyo ninnoona wira nvirikanyiho wookela. Hiyo noosuwela wira ori vaava, khaavo onwerya okhootta. Oh, wulu! Nwehe paahi. Owo onootakhaliha nikhuru nenlo nnihimya wira awo animurumeela Muluku. Nwehe yeyo.

⁸¹ Muluku aalale Epyo Awe. Miyo kinoomaliha, 'okhala wira okathi wopacerya elinya ya mavekelo. Muluku aalale Epyo Awe, ni Epyo Awe ti Kristu. Miyo kinrowa olaleya yeyo ohiyu kamosa kamosa, vaavo Muluku aatthunne awe ohela Nsina Nawe, Apwiya yatthuna vale, alakela olya wa voosiisu kakhalanaru okhati wowaatta vakhani. Nkawehani, Owo ti Ephiro emosa y'ovuluwa. Owo ti Muwerya eekeekhai paahi. Owo ti Muluku mmosa paahi eekeekhai, khaavo akina woohikhala Yowo. "Miyo ka Muluku, ni Muluku mmose-ene," Owo ohimmye wira. Yesu ohimmye wira, "Ela ti yooruma: Nwiryane, O Isarayeli, Miyo k'Apwiya Muluku anyu, Muluku mmosa paahi. Miyo ka Yowo. Munimuhaaveryani mukina? Mukina onimoorwa . . . Miyo kinoorwa mwa Nsina n'Atithi Aka, nave nyuwo khamunikaakhela. Masi mukina onimoorwa mwa nsina nawe mwanene, nto owo nyuwo munoomwaakhela." Nto awo yiirale yeyo oNicea.

"Nyuwu mwa muKristu?"

"Miyo ki muPatista."

"Nyuwu mwa muKristu?"

"Miyo ki muPentekosite."

"Nyuwu mwa muKristu?"

"Miyo ki Metotista," nsina nikina.

⁸² Masi naphiyererya Nsina nle na "Yesu Kristu," awo anoorowa ottaiwene na Nenlo ntoko siniwery'aya, awo khandthuna hat'etthu ni Nenlo, maana Owo ti Masu ni Masu aniihimya Mmansaya. Nwehe, ephiro emosa y'ovuluwa! Owo ti Ethutu ya Saroni, Bibilia ohimmye wira Owo aari yeyo. Khula ethoonyeryo (mBibiliani) ya Muluku ti ya Yesu Kristu. Owo aari Alfa, Omega, Ephattuwelo ni Emalelo; Ole Aakhala, yowo Onkhala, ni Onrowa Orwa; Yoophuwa ni Osuulu wa David, soopiili Yoophuwa ni Osuulu wa David; Nivoroxa n'Oxaka, Ethutu ya Saroni, Ekhokowa ya Mukhatoni, Alfa, Omega, Tithi, Mwana, Eroho Yowarya, sothene mwa Yesu Kristu! Owo aari wiisooniherya woomalela wa Yehova Muluku iipanke erutthu wira akhale ni hiyo. Vekeekhai ti yeyo Owo aary'awe.

⁸³ Owo aari Ethutu ya Saroni. Awo yiirihakani Ethutu ya Saroni? Awo yaamuwama, onyatta, wira akumihe yowunkhela mwa Yeyo. Ethutu yooreera ehaana owammwa wira ekumihiwe yowunkhela mw'ethutu yeyo. Eyo yaari Ekumi yooreera, khiyakanle hata ekumi yookhaliwa ntoko Yeyo, masi Eyo yaahaana owammwa oKalvario.

⁸⁴ Moone, awo yaakuxaka mu—muttikithelo wa Ethutu ya Saroni khumuhela Aroni, owo aahaana ottikitheliwa ni yawo wira akele ohoolo w'Apwiya nipuro noowaaryexa, m'wekuwoni yowaaryexa. Owo aahaana ottikitheliwa Ethutu ya Saroni, wira avolowe amiserye mukhuneelo khula mwakha. Nto makhura awo yaahaana okhala mwa yowo, yowunkhela yoosivela wa Apwiya, akunxeene ephome ya mwapwittipwitthi ohoolo wawe, n'uwo amanleene omiseriwa ni mwapwittipwitthi. Mihorokho n'ittiwi sirukurerihiweene nlaya nawe, owo aahaana weetta nivalo nno, arumihaka "owarya, owarya, owarya t'Apwiya."

⁸⁵ Nwehe, Owo ti Ethutu yele ya Saroni, yele Yowunkhela yoosivela, Oottikitheliwa athu Awe. Khamunwerya orwa ohoolo Wawe ni eyaminelo, etthu p'itthu ekina, woohikhala ottikitheliwa ni Ethutu yele ya Saroni, Masu. Owo nave ti Ekhokowa ya Mukhatoni.

⁸⁶ Vano, munikhalana sai epuruma? Munikhalana epuruma mwakuxaru ekhokowa khuwama, munookhalana epuruma. Matothoro annivarela muteko mulaporatorio mw'aya. Mmukuxe mulopwana onanariwe ni ovolonle, wala muthiyana, owo onona ntoko onrowa othatuwa anepa, owo oneeta nno ni nno akhuwelaka, owo onikhala ookwanyuwa, tothoro onookuxa epuruma awe y'ekhokowa vakhani khumpophela yeyo vamononi vawe wala mutika nipuro nno, wala wa mulopwana, nto awo anoomaala. Yoomala okathi vakhani. Masi naanaanoru epuruma ele enimal'aya, awo anoorwa tho va, ootepaxa ovikana saatonko aya okhala.

⁸⁷ Masi miyo kinimooleelani, apatthani, eyo ethoonyeryo paahi ya Epuruma yooloka enikhuma Mukhokowani ya Mukhatoni miyo ensuwel'aka. Owo ti Ekhokowa ya Mukhatoni. Owo owammwe oKalvario. Owo ohaaxeriwe sootheka sahu, ni makhwatta Awe tanivonin'he. Mwa yeyo, owammwa iwe wa ithutu, Owo aari Ethutu. Owo aari Ethutu yuulupalexa etonko wunnuwa, aari Ekhokowa ya Mukhatoni, ni Ethutu ila yuulupale ya Saroni. Vano Owo ori musulu ohiy'ula, ookoliweene eriyari y'Erimu ni vathi, miyo kookupali, wira Owo aahikhala okathi ule, kiireke, wira—wira akumihe itampi s'atthu ni wira ahokoloxerye openuwa mulaponi. Ni Bibilia ohimye wira Owo mmosaru nsana, olelo, ni mahiku othene.

⁸⁸ Mpatthani, okathi Muluku waamuhimenry'awe Moise, mothakoni, yeyo yaari e—ethoonyeryo ya Yowo, wira avenxe enowa y'eporonse. Nto eporonse enthoonyerya

etampi elamuliwe, enowa enthoonyerya, *enowa y'eporonse* enthoonyerya “etampi emanle olamuliwa.” Okhala wira, *eporonse* “Olamula wa Muluku,” ntoko altari a poronze vaavo saapwehiwa mikuttho. Nto Eliya nave aawen'he osulu khwira wira musulu waari ntoko eporonse, olamula wa Muluku onirweela muttethe omuhin'ye Muluku. Eporonse enthoonyerya olamuliwa, olamula wa Muluku. Nto enowa yaathoonyerya etampi yoolamuliwa-ene; nto Yesu aari enowa yeyo aakhalahiwe etampi mwaha wa hiyo, ni khikuxa ehukhumu ya Muluku mwa Yowo. Owo ohaaxeriwe soottheka sahu, onyakatteliwe sootakhala sahu, ehukhumu enniruuhele murettele yoomulemela Yowo, ni ni makhwatta Awe t'anivonin'he.

⁸⁹ Oh, Muluku ookhalana arumari Awe oosareya Epuruma, ohiy'ula, wa nyuwo. Mpatthani muKristu, nyuwo muniwereiwa ni munihaawa. Oh, nyuwo murimooceya, ti yoorikaxa wa nyuwo. Khamunwerya ovilela okathi wowaatta, nyuwo—nyuwo munoovahuwa nihiku nla na vano nnikhal'ahu.

⁹⁰ Nyuwo moomuwiriyana *Life Line* ohiy'ula, ele awo ahimanse aya, wira—wira Russia onihimya wira, mwa '55, awo yaamukhala “arumaka olumwenku wothene namukhuluwuru”? Ehinatthi wiiraneya eyo, Okuxiwa ohaana orwa. Vano moota ery'aya vakhiviru yeyo, mpatthani? Eyo eri vaava va vakhiviru.

⁹¹ Nyuwo khamummurowela Yowo ohiy'ula ni murim'anyu wothene? Owo ti Ekhokowa ya Mukhatoni, ni Owo mmosaru nsana, olelo, ni mahiku othene. Owo ori vaava ohiy'ula wira aivenxe Mmansawe eriyari y'atthu Awe, tthiri ntoko Moise aavenxal'awe e—ekhanyeryo ya etampi, elamuliwe. Nave kahi etampi paahi, masi ni eretta tho. Muupuwele, Yesu ohimye wira, “Ntoko Moise aathomeiy'awe enowa y'eporonse, siiso Mwana a mutthu ohaana othomeiwa.” Mwaha wa xeni Moise aathomeiy'awe? Mwaha w'etampi, ohaamini, ni mwaha w'eretta. Yesu oothomeiwa, nave tho, mwaha w'etampi, eretta, ni ohaamini. Owo aari etthu emosaru.

⁹² Vano, ohiy'ula, mahiku orin'ahu nvirikanyiho ola muulupale, Yesu Kristu oohimya mwa Luka, wira mahiku a... ahinatthi Orwa Apwiya, yaarowa okhala ntoko saary'aya mahiku ooSotoma, ni okathi Mwana a mutthu aarow'awe wiisoniherya Mmansawe, ntoko Mwana a mutthu iisoniheny'awe Mmansawe wa Abrahamu ohitto iwe; Elohim, Muluku, owiipaka erutthu eriyari y'atthu, nto khukhala iwe n'Abrahamu ni khumooniherya, khumuhimeerya etthu Sara uupuwel'awe (akilanthene ottuli Wawe) mmuxaaxani, yowo Owo ahaatonko awe wona. Khumuhimeerya etthu owo...Ni khumwiihana ni nsina na, “Sara.” “Abrahamu,” kahi nsi—kahi nsina nawe Abram, nenlo owo aayaraniw'awe, masi Abrahamu. Kahi Sarai, S-a-r-a-i; masi S-a-r-a, “Ari vai amwaar'inyu, Sara?”

Khwira, “Awo ari mmuxaaxani ottuli Wanyu.”

⁹³ Khwira, “Miyo kinrowa woothotolani nittharihaka okathi w'ekumi.” Nto awo khutheya. Owo khwira, “Awo atheyenleni?”

⁹⁴ Vano, Yesu ohimmye wira, “Okathi vakhani nvirikanyiho ola ohinatthi othukumanyiwa khupahiwa, wira Mwana a mutthu onimwiisoniherya Mmansawe mwa enamuna emosaru ntoko Owo siiraly'awe okathi ule.” Nto eyo e...Exeni iyo? Eyo ovenxiwa, emara ekina, ohoolo wanyu, wira Yesu Kristu mmosaru nsana, olelo, ni mahiku othene. Nyuwo munnaamini yeyo? Nrowe nuuramihe miru sahu nto nivekele.

⁹⁵ Muluku oothuneya, hiyo ninnoophentani Nyuwo. Masu Anyu t'a—t'a Ikuru sinci-ene wa hiyo, Pwiya. Hiyo ninniphenta Yawo paahi! Hiyo nnikhala ni Yawo, Pwiya. Enikhala ntoko owerya wahu khonikhalakhala ophieryaka. Hiyo paahi onnininisivela okilaathi vameesa Vanyu, eriyari ya Masu Anyu, n'upuha iparakha sanyu, Pwiya, naathukumanaka siisa, axinna alopwana n'athiyana yawo ari oothummwa ni Ephome ni Mwana a Muluku, yowo ori oothummwa ya Ephome Anyu. Nto hiyo nnoorwa va ohiy'ula, Pwiya, hiyo noovahererya mahiku ala ohiyu wira naavekelele aretta. Nto ntoko Solempwa, Nyuwo muhimmye wira “ni makhwatta hiyo noovonihiwa.” Khivanthuneya olompa nto (ohimya itampi sahu paahi), maana ni makhwatta Anyu hiyo noovonihiwa (etthu evinre). Oh, nihiku xeni n'owoopoliwa! Nati—natiri xeni a Emanuweli! Wira Eyo vekeekhai Ekhweeli.

⁹⁶ Nyuwo muhimmye wira, “Okathi vakhani, olumenku khunikoono tho, masi nyuwo munookoono, maana Miyo” (mukhalelo wa mutthu wa “Miyo”) “Miyo kinookhala ni nyuwo, hata mwa nyuwo, mpakha emalelo y'olumwenku.” Ni woomalelani w'okathi, emaliheryo ela yuulupale, Nyuwo muhimmye wira, okathi vakhani ohinatthi wiiraneya, enrowa okhala vekeekhai ntoko ohinatthi omora moro oSotoma khupaha olumwenku wa Amalapo, wira waamoorwa wiisoniherya wa Mwana a mutthu vekeekhai ntoko saary'aya oSotoma. Tithi, atthu ahihalelele eyo.

⁹⁷ Nto miyo kinvekela, Muluku, ntoko etthu yaamukhani yoolipa murima, (kaahimmyeene etthu yoovonyeya, mukilevelele), kitthokihaka muteko mukina. Miyo kinnaaphenta awo, Pwiya. Miyo—miyo kinvekela wira ahihalelele eyo. Muhiye ola okhale ohiyu omosa muulupale, Pwiya. Wira khula muretta, ooxanka, oohoona, etthu p'itthu eri mu, Pwiya, avonihiwe ohiy'ula. Wira khula natampi oopowe. Mmurimani mwaya naanaano va, yaari oohaamini, nto amukupali Kristu okathi yola. Munivahe, Tithi. Othene ari mmatatani Mw'anyu. Hiyo niniivahererya mmansihu wa Nyuwo, wira niwooneni Nyuwo orwa eiyari ahu.

⁹⁸ Ni Nyuwo moohimya, mwa Yohani Owarya 14:12, “Ole onikaamini Miyo, miteko Miyo sinvar’aka nave tho owo onoovara.” Moota hiyo onsuwel’ahu wira Nyuwo muhisuweliha Mmansinyu w’atthuni, maana Nyuwo mwaari Profeta yole Moise aahimme awe wira aamuvenya. Awo khayaarina maprofa mwa iyakha imiya sene, nvirikanyiho waari mapuro othene, masi nnakhala vo Masu a Muluku yaahaana omaliheriwa; tivo Nsu naahiipaka erutthu, ni siiso waahiraneya ni nvirikanyiho. Vano, Tithi, hiyo ninnoona yeyo tho olelo, nvirikanyiho okhalaka nivisi nuulupale; ni hiyo ninnoona Masu arwaaka siiso. Munreerihe ohiy’ula, Tithi. Hiyo ninniivahererya wa Nyuwo, ni Masu Anyu. Etthu p’itthu Nyuwo entthun’anyu wira hiyo niire, mwiire ni hiyo, Pwiya. Mwa Nsina na Yesu. Amen.

⁹⁹ [Munna mmosa onlavula elavulelo ekina. Nipuro vahiitthu mufiitani—Mol.] Hiyo khaninsuwela etthu Owo ohimaly’awe. Siiso Owo atthunaka onihimeerya etthu, tivo mukhale paahi oottittimiha vekeekhai okathi vakhani. [Nipuro vahiitthu mufiitani. Munna mmosa onootaphulela.]

¹⁰⁰ Amen. Nyuwo mootoko osoma [Nipuro vahiitthu mufiitani—Mol.] Solempwa nipuro nwanani aarw’awe, nto awo othene yaathukumanne vamosa, nto awo...nwanani aari ekuru yuulupale. Nto Eroho ya Muluku khimukhuruwela mulopwana mmosa, khimuhimeerya, nto owo khuhimya ntoko profeta, ni khuhimya nipuro n’orowa owehererya, nto awo yaahimutoloxa nwanani aya. Eyo enoorwa tho vo. Nookhala nipuro n’omutoloxa nwanan’inyu, moone, muvarele ntata na Muluku. Ntata na Muluku ti Kristu, vekeekhai, Masu, vano mukuxe yawo mmurimani mwa’nyu ohiy’ula okathi oniihan’ahu elinya ya mavekelo.

¹⁰¹ Kookupali wira Billy ookawa ittikitti sa mavekelo tho olelo. B, iBee, nrowe nikuxe B, miloko mithanu na miraru ni thanu. Nsana ohiyu, naarina muloko ni thanu nsana ohiyu. Hiyo okathi p’ukathi ninneehererya okuxa soophiyaka muloko ni thanu ohiyu omosa. Nto vo muvarele ittikitti sanyu, hiyo nnimwiihana iyo, naanaano. Nrowe neehererye soophiyaka muloko ni thanu. Muloko mithanu na miraru ni thanu. B, ntoko Branham, nyuwo moosuwela. B, muloko mithanu na miraru ni thanu mpakha emiya. Nto hiyo. . .Nrowe noone, t’ani orina B, miloko mithanu na miraru ni thanu, muvenxe ntata nanyu. Nyuwo mookupali. . . Oh, ottuli, vaareera, miloko mithanu na miraru ni thanu murwe nno.

¹⁰² Vano, mwana’aka. . .Vano pooti akhanleene anamurwa va, khayaarowa osuwela moota yiiriw’aya ela. Mwana’aka onoorwa va, wala mutthu; owo aahiwerere orwa, Munna Borders, mutthu mukina. Mulopwana mmosa onimoorwa, ni okuxa ittikitti iya, imiya sene, nto eemenleene ohoolo w’atthu onootakanxa. Vano owo oovahanru ettikitti emosa, khanwerya woohimeeryani wira nyuwo munrowa okhala va vaplataforma, owo khansuwela eyo.

Ni nnakhala miyo nkinsuwela. Miyo kinoorwa ohiyu, n'ukumiha soophiyaka muloko wala muloko ni thanu, etthu ntoko siiso, muhina mwa ittikitti iyo. Eyo kherina nata n'uvonihiwa wanyu. Nyuwo pooti okilaathi vaavo. Nkawehani, nsana ohiyu. Akavi yaari vaava nsana ohiyu, nintthuna noone ntata nanyu? Moota athu yaavonihiw'aya muthukumano wothene!

¹⁰³ Vano, yaari miloko mithanu na miraru ni thanu, miloko mithanu na miraru ni thanu na mosa, miloko mithanu na miraru ni thanu na piili, miloko mithanu na miraru ni thanu na tthaaru, miloko mithanu na miraru ni thanu na xexe, miloko mithanu na mixexe. Arwe naanaano va. B, miloko mithanu na miraru ni thanu, miloko mithanu na miraru ni thanu na mosa, miloko mithanu na miraru ni thanu na piili, miloko mithanu na miraru ni thanu na tthaaru, miloko mithanu na miraru ni thanu na xexe, miloko mithanu na mixexe. Eyo yaarowa okhala emosa . . . Vekeekhai, hiyo nintthuna . . . Nto vakhala wira mutthu . . . Va ori mukina, ayo, eyo ennimaleliha. Miloko mithanu na mixexe, miloko mithanu na mixexe mpakha emiya vano. Miloko mithanu na mixexe, miloko mithanu na mixexe ni mosa, miloko mithanu na mixexe ni piili, miloko mithanu na mixexe ni tthaaru, miloko mithanu na mixexe ni xexe, miloko mithanu na mixexe ni thanu, miloko mithanu na mixexe ni thanu na mosa, miloko mithanu na mixexe ni thanu na piili, miloko mithanu na mixexe ni thanu natthaaru, -thanu na xexe.

¹⁰⁴ Mwaahiweryeke weetta, nyuwo mwaakhanleene . . . Miyo kinnoona wira nookhalana ikhatera sa rota piili, tthaaru va vano, xexe, kookupali, kinniweya wona. Nyuwo mwaarineene ettikitti ya mavekelo, nakhala—nakhala nummaru nanyu nniihaniwa, ni muhiweryaka weetta, muvenxe ntata nanyu paahi, hiyo nnimoophiihani nno.

¹⁰⁵ Ni mwaahikhalane hata ettikitti ya mavekelo, mukilaathi vaavo paahi muvekeleke, mwiire, "Pwiya Yesu, muhiye—muhiye—muhiye kikhale miyo ohiy'ula." Akavi mu ahirina ettikitti ya mavekelo, muvenxe ntata nanyu. Oh, wulu! Vaareera, vano nrowe nihimye ela paahi, miyo kinroromela wira kheniweya ntoko oveeha. Masi aahikhala mwamuthiyana mmosa emara emosa ahaarina ettikitti ya mavekelo, hiyo naamuhimya. Owo aahirowa apunyeeryaka aviraka eriyari y'athu, owo khwira (vano nwiriyane orateene), "Miyo kaweryaru okwannya ikuwo sa Mulopwan'ole, kinookhala mukumi." Akavi animusuwela wahal'owo? Vaareera. Nto iirale exeni? Aahimukwannya Yowo, khurowa khukilaathi. Nto Yesu aahirukunuwa, Owo aahisuwela nipuro ole vaary'awe. Eyo ekeekhai? Owo aahisuwela exeni waari mukattyamiho awe. Eyo ekeekhai? Owo aahisuwela exeni yaari mukattyamiho awe, vano Owo khumuhimeerya exeni yaari mukattyamiho awe. Nto owo aahoona mw'erutthuni mwawe wira ovuuva

w'ephome waahimala. Eyo ekeekhaii? Mwaha wa xeni? Owo aahimukwannya.

¹⁰⁶ Vano, aKristu akavi va ohiy'ula answela, sintoko aHeperi, Eliivuru ya aHeperi, wira Yesu naanaano va ti Namukuttho Muulupale, Namukuttho Muulupale onwerya okwannyiwa ni ewereyelo sa iretta sahu? Ti Yowo? Vaareera, vaari wira Owo ti Namukuttho Mmosaru, muteko mmosaru, Namukuttho Muulupale, Owo aarowa wira sai nto? Owo aamwwira enamuna emosaru ntoko Owo siiral'yawe okathi ule. Nyuwo munnaamini iyo? Owo aamwiira enamuna emosaru ntoko Owo siiraly'awe okathi ule, mwaaweryakaru wamini yeyo. Vaareera. Akavi anaamini yeyo, muvenxe ntata nanyu, mwiire, "Miyo vekeekhai kinnaamini"?

¹⁰⁷ Vaareera, awo ahinatthi othata elinya ya mavekelo, nrowe nikhallane elinya ya mavekelo ota iwe. Miyo koosuwela wira Owo ori vaava. Miyo—miyo—miyo kinnona Mukhalelo Awe, ni miyo—miyo koosuwela wira Owo ori vaava. Murwe. Elinya ya mavekelo yoolikana? Miyo kaarowa wiihana iwe. Nyuwo paahi—muvekeleke paahi, nweheke epantte ela nno paahi muvekeleke, mwaamini paahi.

¹⁰⁸ Mwamuthiyana mmosa okilaanthi va akiwehaka miyo, okilaanthi vakhiviru ni muthiyana owanre ilumeta. Khamunwerya wona Eyo eri vamuru va muthiyano'owo? Nwehe nno. Munnona? Owo onihaaxeya ni mukattyamiho wa murima. Nyuwo munnaamini wira Muluku onimoovonihani? Mwaaminiki vale, muvenxe ntata nanyu. Ti yowo waari mukattyamiho anyu. Eyo ekeekhaii. Vano vaari wira owo ti waari mukattyamiho anyu, muvenxe ntata nanyu wira athu awerye wona, muvenxe ntata nanyu *siiso*. Vano, nyuwo khamurina tho owo vano. Wamini wanyu ohoovonihani.

¹⁰⁹ Owo mmosaru nsana, olelo, ni mahiku othene. Oh, wookhala nvirikanyiho; masi Yesu Kristu mmosaru nsana, olelo, ni mahiku othene. Ti yela. . . Vano mukhale muvekelaka paahi, moone, khivantthuneya nyuwo okhala osulu nno, wira musuwele.

¹¹⁰ Vano, ola muhano. Ntoko sinsuwel'aka, miyo nkinatoko omoona mwakhalelo aka, ola muthiyana paahi eemenle va, ni ookhalana ettikitti ya mavekelo, ni khamwaasuwela sinto mwaamuruwa wiihaniwa wala nnari. Ookhala mutthu oovan'heni ettikitti ya mavekelo paahi, ni nyuwo—numaru nanyu nihiihaniwa, tivo nyuwo oruuly'anyu va paahi. Eyo ekeekhaii? Ni miyo nkirina enamuna y'osuwela nyuwo mwa xeni, nyuwo mw'ani, otthu onikhum'anyu, etthu entthun'anyu, hat'etthu mwa yeyo. Miyo ki mulopwana paahi, nyuwo mwa muthiyana. Eyo ekeekhaii. Elatarato emosaru yela yaahikhumelela emara emosa mBibiliani, Yohani Owarya, kapitulu 4.

¹¹¹ Vano nyuwo muniira, "Mwiirale exeni nyuwo, Munna Branham, vakeekhai nto, okathi ovinre?" Miyo kiroomela paahi

muteko ole mukina, moone. Miyo nkisuwenle, moone. Owo ohaana wira yeyo. Miyo nkinsuwela. Iirale sai muthiyany'ole iwe? Miyo nkinatoko omoona muthiyany'ole makhalelo aka. Owo mmalapo voomalela wa miyo. Miyo kookupali wira aari muthiyana. T'ani mutthu ule ovonihawe naanaano va vamuthukumanoni? Nvenye... Ayo. Hiyo n'amalapo mmosa ni mukhw'awe. Eyo yaari akeekhai, muttikinye ntata nanyu so. Munnona? Miyo nkinatoko omoona muthiyany'ole. Masi owo aakilaanthi vale, aaminiki. Vano, owo ookwannya Ethhu, khokwannya? Khiyaaphwanyiha hat'ethhu okikwannya miyo.

112 Masi vano nyuwo khamunwerya wona wira Bibilia vekeekhai Masu a Muluku? Owo mmosaru nsana, olelo, ni mahiku othene. Hiyo nmikhala ipa sa Eroho Yowarya yeyo okhanle Kristu. Munnona? Eyo ti Epyo y'ekeekhai. Nto Eroho Yowarya ele y'keekhai yakelaru muhina wa Epyo y'ekeekhai ya Masu, kahi... Eyo khenrowa okuxa epante emosa paahi ya Yawo (okhala wira, xetwani onivarela muteko Yawo), nyuwo muhaana okuxa othene Awo, moone, khula Nuulumo na Yawo; 'okhala wira, Owo kahiyo nusu na Muluku, Owo ti Muluku othene. Munnona? Nto t'ile enikhumelela.

113 Vano, va ori muthiyana mmosa, miyo nkinatoko omoona. Yesu aahimuphwanya muthiyana siisa emara emosa, alakela kahi mukhalelo mmosaru, miyo nkisuwenle. Vano Owo aakilaanthi vehimeni. Owo—Owo aatthuna orowa mpakha oSamariya. Nto hiyo ninnoona wira, Samariya aari vathi va mwako. Nto—nto Owo aarowa oYeriko, kiireke, vano Owo khuvira oSamariya, khurowa muttethe mmosa w'oSikari. Vano Owo aahikilaathi vehimeni, ni khwaaruma awiixutti Awe ophavela yola.

114 Maloko makavi aatthu akhanle mulaponi? Mararu. Khami, Semi, n'atthu a Yafeti. Hiyo othene nikhumme mwa Nowe. Nto elapo yothene yaahihononiwa okathi ule. Maloko mararu aatthu paahi, awo ti aYuta, Amalapo, ni aSamariya (yawo yaari nusu aYuta ni nusu Amalapo). Nto awo ti maloko othene ari mulaponi, moone, mararu paahi.

115 Itthu sothene mwa Muluku sinlikana mwa tthaaru. Vekeekhai ntoko iya tthaaru saalavulaaka ohiy'ula: imara tthaaru sa nvirikanyihyo, imara tthaaru sa Nsu niipanke erutthu, siiso. Munnona?

116 Vano, ni Ole—Ole aalavunle n'aYuta, aahimuhumeerya Filipe, okathi owo waamuruuhal'yawe Natanayeli, nipuro vaary'awe, khwira, "Miyo koomoona okathi vaary'awe vathi va mwiri." Owo aahimuleela... Antere aamuruuhale Pedru, Owo khwira, "Nsina nanyu mwa Simoni, nto nyuwo munrowa wiihaniwaka 'Pedru' okhuma olelo mpakaha ohoolo." Khwira, "Nyuwu mwa mwana a Yona." Munnona? Vano, awo othene yaari aYuta.

117 Masi va Owo onrowa wa Mmalapo. . . kahi Mmalapo, masi muSamariya.

118 Vano okathi w'Amalapo. Khanavareke eyo hata emara emosa n'Amalapo. Mwavvyave Solempwa. Khanatoko. Masi Owo aahihimya, mwa Luka 22, wira Owo aamwiira yeyo okathi vakhani ohinatthi Orwa.

119 Masi Owo aakilaanthi vale, nto va onoorwa mmosa ori nusu muYuta ni nusu Mmalapo, muthiyana. Nto Owo khumuhimeerya, "Muthiyana, mukiruuhele maasi."

120 Owo khwira, "Vano, khivaatthuneya Nyuwo ovekela yeyo, vanci-ene. Hiyo na. . . Wookhala ovalaanyana va. Nyuwo mwa muYuta, ni—ni miyo ki muSamariya."

121 Owo khwira, "Masi mwaamusuwenle Ole nyuwo onlavulan'anyu, mwaamukivekela Miyo maasi." Exeni Owo iir'awe? Aathokosa eroho awe. Nto Owo vamanly'awe ophwanya exeni yaari mulattu awe, vano, Owo aahimuhimeerya omurowela iy'awe. Owo khwira wira khaarina hata mmosa. Owo khwira, "Eyo ekeekhaii, nyuwo mwaahikhalana athanu."

122 Vano, nkawehani, okathi aFarisi vamoonly'aya Owo wira siiso. Vekeekhai, nvirikanyiho ole wa Masu, exeni awo yaahimaly'aya? Awo yiirale, "Mulopwan'ola Pelizepuli, nahako." Munnona?

123 Nto Yesu ohimye wira, "Othene ole onrowa ohimya yeyo aveehaka Eroho Yowarya okathi Eyo enr'waya wira etthu emosaru, khankhalakhala aleveliwaka." Vo t'uri nvirikanyiho anyu. Munnona? Masi Owo ohimye wira aamwaalavelela okathi ule, okhala wira Eroho Yowarya yiira ehinarwe; Mukuttho, Mwapwittipwitthi iira ahinakhwe.

124 Masi nto muthiyany'ole khuupuwenle yeyo. Muthiyany'ole iirale, "Napwiya, miyo kinoona wira Nyuwo mwa profeta." Awo khayaarina profeta iyakha imiya sene. Khwira, "Miyo kinoona wira Nyuwo mwa profeta. Vano, hiyo noosuwela wira Mesiya, yowo onihaniwa Kristu, Owo arwa vale, eyo t'itthu Owo onrow'awe wira."

125 Vano, vaari wira eyo t'ile Owo iirly'awe, vano Owo mmosaru nsana, olelo. Eyo ti moota Owo iisuwelin'he awe Mmansawe nto, kehiyo etthu emosaru olelo? Ehaana okhala! Vano, va ori muthiyana ni mulopwana anikumana tho. Ola kahiyo muthiyana yole, miyo nkhiyo Mulopwana yole. Masi nlelo Eroho Yowarya emosaru eri vaava, ni yaahimuhimya natiri wira miteko Owo saavar'awe, hiyo naamuvara etthu emosaru mahiku Mwana a mutthu aarow'awe wiisoniherya.

126 Vano, kihoosuwelakani nyuwo (ni nyuwo moosuwela wira eyo ekeekhaii), hiyo khaninsuwelana mara, ni nyuwo mweemenle va. Yookhala emosa. . . Khino etthu evonyen'ye ni nyuwo, khino khekhanle, miyo nkisuwenle. Masi vaari wira

Apwiya Yesu anookuupululela miyo, ni Eroho Aya Yowarya, ole ori mukattiyamiho anyu, nyuwo munimwaamini nto wira Owo Mwaana a Muluku, ni kahi mutthu? Nla nikatamphe paahi, empa *ela* yeyo—yeyo Muluku onvarel'awe muteko, mutthu ti mutthu Owo onimuthanl'awe. Owo—Owo oniira eyo ni mahala w'otthuna ni w'othanla. Vano, masi nyuwo munaamini. Munimwaamini? [Muthiyana oniira, "Amen."—Mol.]

¹²⁷ Akavi vamuthukumanoni anrowa wamini? Va hiyo owanli nniphwanyaneya va ohoolo wa Warya, wira hiyo khinnatoko okumana makhalelo ala, nkirina hata ankhili wo wira muthiyan'ole ti pani, etthu owo ory'awe, otthu onikhum'awe, etthu owo onthun'awe. Miyo nkinatoko omoona mwa makhalelo aka, siiso tho kihinatoko aka omoona muthiyan'ole vathi *vale* mwa makhalelo aka. Masi, moone, ela t'itthu miyo entthun'aka wira nyuwo mwiire: mukumihe nvirikanyiho owo mwa nyuwo naanaano, nto mwaamini Masu okathi Masu aniipak'aya erutthu eriyari ahu. Masu anikhala makumi mw'erutthuni mw'ahu yoohi, eyo enooniherya Mukhalelo wa Muluku.

¹²⁸ Vano Awo anvaha owo yeyo. Owo onthuna nniwoko nooloka. Owo kharina mwana, ommutthuna mwana. Orina iyakha soophiyaka miloko mixexe. Eyo vekeekhai kahi yoohiweryaneya.

¹²⁹ Awo akilaathanse vale naanaano va, athiyana yaari owuupaala makhalelo aya othene, khurwa vaplataforma siisa, vano Apwiya khwaavaha aana. Akina a nyuwo muvenxe matata ale ansuwela. Munnona? Munnona? Miyo kaahimuttotta mwanamwane mwamuthiyana oophenteya nihiku nno, Ettiminku, vaamaly'aka okhuma va, Ettiminku oxekuwa; amey'awe yaari owuupaala, Apwiya khulavula. Nto mwanamwane mwamuthiyana owo, etthu yoosivelaxa, ori vaava? Ori vai? Ayo. Ola ori va, vaava va, okilaanthi va. Amey'awe akilaanthi vale. Ola ori va mwanamwane ene, yowo ene. Munnimoona? Owo aari Nsu noolavuliwa nookhuma wa Muluku.

¹³⁰ Vano, nyuwo munoomwaamini Yowo ni murim'anyu wothene? Nyuwo munnaamini wira eparakh'eyo nyuwo murin'anyu, yeyo munoon'anyu mwa nyuwo vano, ti Muluku aakhunle? Muluku aakihimenrye nsina nanyu, wira mmuvahe nsina mwana, nyuwo mwaamwaamini? Vano, Muhano Thompson, muroweke owani mwakhalane mwan'inyu, mwaaminiru ni murim'anyu wothene.

¹³¹ Nyuwo munnaamini ni murim'anyu wothene? Mwaamini paahi, muhiverye, mmwaamini Muluku paahi. Muluku Mulukuu.

¹³² Ehali anyu, mulopwana? Miyo kookupali wira n'amalapo, nave tho. Emara emosa miyo otonko aka owoonani mwa makhalelo aka, ntoko sinsuwel'aka, okathi nyuwo waarw'anyu

vo. Nto miyo koono wira mwaari ahaalu awe Munna Shakarian, wala t'ani. . . Mashagian, Munna Mashagian, mulipa-oowiipa, okathi waavir'anyu. Nto miyo kaahiwoonani murowaka mulinyani wa mavekelo. Vano, kikhanly'aka mmalapo ni nyuwo, ni, ahiso wa nyuwo, ni miyo ki mmalapo, khula enamuna. Vano, vaari wira Apwiya Yesu anookileela etthu yeyo nyuwo—yeyo nyuwo muryanyu, alakela etthu entthun'anyu, nrowe paahi nihimye yeyo; woohimeeryani etthu, okihimeerya etthu entthun'anyu. Vano, Awo ahoovahani. Etthu emosa enntthuneya okhalana wamini woophiyerya.

¹³³ Vano, akavi aniiwa sana yeyo? Wamini paahi oniphiyerya wira mwaamini wira munoophwanya etthu envekel'anyu! Munnona?

¹³⁴ Vano, vano, mwaaryeene osulu nno mutthunaka etthu, ni Owo onniwerya okileela etthu entthun'anyu, vano nyuwo moosuwela wira miyo nkinsuwela etthu entthun'anyu, vano ehaana okhala Etthu emosa va eniira. Vano, ntoko Masu, Owo oohimya wira onimwiira yeyo. Owo aanisuwela miyuupuwelo sa mmurimani mw'aya. Eyo ekeekhai? Vaareera.

¹³⁵ Nyuwo munnitthuna vanci-ene ovonihiwa. Etthu emosa, nyuwo munihaxeya ni mukhalelo w'onanariwa, onanariwa vanci-ene. Eyo ekeekhai. Etthu ekina, nyuwo murina mukattiyamiho wa muthana, ni muthan'owo onnitepaxa okathi mukina, nyuwo hata mwaahiphiyerya wooperariwa. Eyo ti SIISO ANIHIMYA T'APWIYA. Eyo ekeekhai. Moone. Eyo ekeekhai. Nto va yookhala etthu ekina, entthunaxa'anyu, t'ila, nyuwo muntthuna mwaakhele opatiiso wa Eroho. Eyo vekeekhai ekhweli. Murwe va.

¹³⁶ Muluku ootthuneya, mwa Nsina na Yesu Kristu, mulopwan'ola asarihiwe ni Eroho Yowarya, ahinatthi okhuma mapuro ala, mwa Nsina na Yesu. Amen.

Vano mwaakhele Eyo, munn'aka. Mwaamini paahi, muhioverye.

¹³⁷ Ehali anyu? Miyo kinoona wira, ntoko sinsuwel'aka, hiyo n'amalapo mmosa ni mukhw'awe. Yaari ekheekhai, vano, wira athu asuwele, muvenxe ntata nanyu paahi wira awo yoone wira hiyo n'amalapo. Miyo nkinatoko omoona mwa makhalelo aka, voosuwela. Ni miyo kinoona wira owo khanatoko okoona, 'woohikhala vamuthukumanoni. Okhala wira Atithi a Wirimu annisuwela, nto va ari Masu Aya ari va, wira miyo nkinatoko omoona muthiyen'ola, voosuwela, makhalelo aka. Tivo, miyo nkaasuwela etthu mukhalenly'anyu va, hata nkinaanyiherya wira nyuwo mw'ani, etthu, hat'etthu wa nyuwo. Nkaarowa owerya woohimeeryani etthu emosa.

¹³⁸ Etthu emosa paahi, eyo yoovaha paahi. Miyo kaweryaru. . . Ntoko sikiiwaly'anyu ohimya yeyo okathi ovinre. Orowa epante emosa, wiiwelela etthu Owo onihimya'awe; etthu

enoon'aka, miyo kinoowerya ohimya. Etthu Owo ohinihimy'awe, miyo nkinwerya ohimya. Miyo kaamuhimya mmansaka, ni yaamukhala yoovonyeya. Munnona? Yaamukhala yoovonyeya. Masi Owo ahimyaruru, eyo ekeekhai voomalela. Khivanweryaneya okhala, khenatoko okhala yoovonyeya. Khenkhalakhala evonyeyaka akhalaru Muluku. Munnona? Moone, okhala wira khivanweryaneya Muluku ovonya.

139 Masi vaari wira Muluku onoowerya okileela etthu entthun'anyu, etthu emphavel'anyu, wala—wala etthu mukhalenly'anyu va, etthu mwiiraly'anyu, wala etthu, etthu siiso, wala wira nyuwo mw'ani, otthu onikhum'anyu, wala etthu p'itthu Owo onthun'awe okileela, nyuwo mwaamwaamini? Kooxukhuru.

140 Etthu emosa, nyuwo murina mukattyamiho ni inawo sanyu. Inawo sanyu sinimoohaaxani. [Muthiyan'owo onira, "Ayo."—Mol.] Eyo ekeekhai. Muvenxe nta...Mookhalana mukattyamiho wa athiyana, muxankiho wa athiyana. ["Ayo."] Ni yookhala etthu entthun'anyu vanci-ene mmurimani mw'anyu, okhala wira nyuwo ohoopweteyani mutthu wala etthu. Owo mwammiravo, mwammiravo anyu orookhuma owani, khutthyawa, vano nyuwo muntthuna wira miyo kilompe wira athikele owani. ["Ayo."]

141 Muluku Wirimu, mmuveleeliherye mwan'awe, n'upenuwa. Muhiye Eroho Yowarya emweemexe mmiravo owo mphironi ohiy'ula, mmuveleelihe athikele w'amey'awe. Mwa Nsina na Yesu. Amen.

142 Owo okhanle Ole onimusuwela onoomutthikiherya wa nyuwo. Muhixanke. Mwaamini vano, muhioverye. Mwaamini paahi, murim'anyu wothene. Nyuwo mwaamini, nto Muluku onimoovahani sikina.

143 Vano, othokorerya nno miraru wala mixexe, enakhaleru etthu p'itthu, moone, miyo—miyo kiroorowa mpakha eyo okiriipela miyo. Miyo nkinwerya otaphulela eyo, khiyavo enamuna y'otaphulela. Nyuwo munira, "Muntthuna ohimya wira, eyo yaari yootepa ovikana silalen'yanyu vale minuwa miloko mixexe wala soovikana, munuupuwela siiso?" Ayo, mulopwana. Saari iwora tthaaru, khisaarowa watta.

144 Muthiyana mmosa aahikwannya nlaya na Pwiya ahu Yesu. Nto athu ale khanikikwannya miyo. Vano, muthiyan'ola va, nwehe nno paahi, owo aamuwerya paahi... (Mukipweherye matata nanyu. Munnona?) Owo ookikwannya miyo othene, khekhumelenle hat'etthu, miyo ki mutthu paahi. Masi owo ohaana omukwannya Yowo. Nto miyo, ni yoovaha, paahi—paahi... eyo enoorowa paahi, miyo kinoorimeela voomalela, nto miyo kinihimya paahi ele miyo enoon'aka. Munnona? Nto ti yeyo tu. Moone, okikwannya miyo khenihimya etthu, masi owo onimukwannya Yesu mwa miyo. Ti siiso muthiyan'ole

aamukhwannyale awe Muluku mwa Yesu, okathi Owo ahaasuwel'awe mukattyamiho waari ni yowo. Owo aakwannyale nlaya Nawe paahi, khurowa khukilaathi. Nto Owo khwira—nto Owo khwira, "T'ani okikwannyale?"

145 Nto arummwa khwira, "Vano, atthu othene anookwanyani Nyuwo. Munihimeryani siiso?"

Owo khwira, "Masi Miyo kinoona wira ikuru sookhuma mwa Miyo."

146 Vano, nyuwo moosuwela ikuru xeni? Owerya. Owo aahitteettheya mwaha wa muthiyana mmosa omukwannya Yowo, ni Owo aari Mwana a Muluku. Ankhi miyo, natampi, oopoliwe ni mahala Awe? Nyuwo moosuwela mwaha wa xeni enikhalel'aya yowaatta? Okhala wira Owo ohimmwira, "Itthu iya Miyo sinvar'aka, nyuwo munoovara nave tho. Soovikana iya munoovara, maana Miyo kinrowa w'Atithi Aka." "Suulupalexa," Yaahimya vale, masi otaphuleliwa w'ekeekhai n'Ekereku ti, "Soovikana iya nyuwo munoovara."

147 Vano, muthiyana ohimmusuwel'aka. Miyo nkinsuwela hat'etthu wa yowo. Owo vekeekhai mmalapo oomalela wa miyo ntoko atthu akina saary'aya. Hiyo n'amalapo mmosa ni mukh'awe. Wira atthu asuwele ela paahi, pooti ovenxa ntata nanyu, mwiire "hiyo n'amalapo." Vano, Mwana a Muluku, vaari wira Owo emara emosa aahimuphwanya muthiyana mmosa mwa elatarato yaamukhani ntoko ela, vakhiviru v'ehime, nto Owo khulavulana okathi vakhani, ni Owo aanisuwela vatthu vaari mulattu awe, ni Owo khumuhimeerya exeni yaari mulattu awe. Nto owo aasuwenle ni yeyo, wira ole aari Mesiya. Vano wira—wira miyo kihaana...Nyuwo mookikwannya miyo, miyo kihookwanyani nyuwo, nto khiyavo ekhumelenle. Masi vaari wira wamini waka (ni yoovaha) ni wamini wanyu (wo wamini yeyo) onniwerya omukwannya Yowo, ni wira Owo pooti olavula mwa hiyo...mwa miyo mpakha nyuwo, nto nyuwo munoosuwela wira Owo ori vaava ntoko Owo saary'awe ve—vehimeni vale oSikari. Munnona? Owo mmosaru nsana, olelo, ni mahiku othene. Nyuwo munnaamini yeyo?

148 Nyuwo mookhalana mikattyamiho sinci-ene, mixankiho sinci-ene, ivelavelelo! Emosa wa itthu suulupale nyuwo entthun'anyu ovekeleliwa wiipa wa makhonyokhonyo. Eyo ekeekhaii. Ekeekhaii? Nyuwo munihaaxeya mwaha wo wiipa makhonyokhonyo. Okathi munoon'anyu nyuwo ovenxa moonoo...

149 Ni nyuwo muheetta p'uhimya wene murima-murima, sinwery'aka wuupuwela. Khino nwehererye minutu mmosa paahi, khino etthu ekina enoohimmwa enrowa okuxa... Wala, nyuwo moosuwela, nyuwo munoona itthu; atthu, nyuwo moosuwela, ntoko munseelelo onirwa ovirikanyihaka Yela.

Awo anira, “Vano, awo arimwaanyiherya eyo,” wala, nyuwo moosuwela, ntoko siiso.

¹⁵⁰ Masi, nyuwo munikhala ntoko mutthu ooreera murima, mulavule ni miyo paahi okathi vakhani paahi. Nrowe neemele va okathi vakhani paahi, okhala wira miyo kinoona wira yookhala etthu ekina tho eri mmurimani mwanyu nyuwo entthun'anyu wa Muluku. Vano, miyo nkaawerya waakhula mavekelo anyu, masi Owo onniwerya wa-. . . Okhala wira, nyuwo mwaaminiru, ehaakhuliwa. Masi mwaatthunaka wamini; wira mwaaminihwe. Vano, miyo kinimooleelani, eyo enimwaasa mutthu onimphent'anyu ohikhanle vaava, vano owo munn'inyu, nto munn'inyu owo khakhanle hata elapo yela. Owo ti niireke a elapo emosa yootothowa, ya mattaara manci-ene. Miyo kaamuhimya wira etthu ntoko oMichigan wala etthu. . . Ayo, Michigan ti weiwo. Vano owo onihaaxeya n'itthu enimwiiva, vano owo mukattyamiho wa isyo ohinvoneya onimuhaaxa. Eyo ekeekhaii, kehiyo? Eyo ti SIISO ANIHIMYA T'APWIYA. Vano, nleso murin'anyu mmatatani mwa'nyu, nenlo mmuvenxeriy'anyu Muluku, mmuroihele nenlo munn'inyu ni mmuleele wira ahihoverye, masi aamini, nto nlo, owo onoovonihwiwa naanaano nyuwo mwaaminiru.

¹⁵¹ Nyuwo munnaamini ni murim'anyu wothene? Moone, nto, mwaaminikiru, eri etthu emosa paahi yo wira, eyo ti, waakhela yeyo namukhuluwuru. Eyo ekeekhaii?

¹⁵² Vano nyuwo munira, “Ale aniweha yeyo, atthu ale. Ti yeyo ale aniiir'aya, waaweha.” Nyuwo munnoona eyo vanci-ene!

¹⁵³ Masi wira nyuwo musuwele ela. . . Muhano ola va, murwe epantte ela nno, muhano, va, muretta, munakhaleru mutthu ti mutthu. Miyo nkimmuweha ola. Nyuwo munaamini wira Muluku onniwerya okuupululela ele eri mukattyamiho anyu? Muvenxe matata anyu, mwaaminiki vale, muhano ola va, muhano ola va, muretta. Ayo. Ayo. Vaareera, vano nyuwo mwaaminiru iyo ni murim'anyu wothene, mukattyamiho owo wa iphumu khunrowa tho woohaaxani. Vaareera, muroweke owani ni mwaamini! . . . ? . . .

¹⁵⁴ Nkimoonne, Eyo yoomoona? Moone, Owo. . . Nyuwo nweheke epantte *ela* nno, yoowoona eri vale hata wira enikhumelela exeni. Amen! Khamunwerya wona? Yooreeraxa voomalela ntoko Muluku onwery'awe okhala ooreeraxa voomalela!

¹⁵⁵ Nyuwo munnaamini, nave tho? Iphumu pooti woohiyani, nave, khivaaweryaneya? Nyuwo munnaamini wira yaamoohiyani? Vaareera, murowe mwaahimeerye Apwiya Yesu wira nyuwo—nyuwo munniwaamini Yawo.

¹⁵⁶ Nihiku nno mwaarowa okhala oomukuxa tto—ttotto mmosa mwaamukhani makhonyokhonyo awo yoorakalihanru, masi kharowa wira siiso. Nyuwo khamu, khamunaamini

wira eyo enimwiiraneya, ti siiso? Nyuwo munnaamini wira munookhala oratteene? Mutthareke ephiro anyu, ni Yesu Kristu onnoovonihani.

¹⁵⁷ Mukattyamiho wa murima onniwiiva atthu, masi khorina y'owiivani nyuwo. Nyuwo munaamini wira Muluku onoovoniha wa nyuwo, ni wookhalihani sana? Murowe mwaaminiki yeyo ni murim'anyu wothene, mwiire, "Miyo vekeekhai kinaamini."

¹⁵⁸ Nyuwo munnilavula Enkelesi? Munniiwa Enkelesi? [Munna Branham onimuvekela mutaphuleli—Mol.] (Ookhala mutthu onirwa.) Ayo, vaareera. Nyuwo munoomuleela etthu miyo emuhimeeraly'aka? Mmuleele wira owo aaminiru, mulattu wa mmirimani onoomuhiya. Owo—owo onimwaamini? Mulattu anyu wa muthana onimoohiyani, nave, vano pooti orowa ephiro anyu ni muvonihawe.

Ehali anyu? Nyuwo munnaamini? [Owo onira, "Ayo, mulopwana."—Mol.]

¹⁵⁹ Mulopwan'ole okilaanthi vale ni mulattu wa muthana, okiwehaka okathi ohimmy'aka yeyo. Owo pooti ovonihiwa, nave tho, mwaaminiru yeyo, mulopwana. Vaareera, mulopwana.

¹⁶⁰ Muhano okilaanthi vakhiviruxa ni nyuwo vo, nyuwo murina mukattyamiho w'exiko, khamurina, muhano? Nyuwo munnaamini wira Muluku onimoovonihani? Nyuwo muntthuna omwiixatherya matata mwammiravo mwaha wa makutha awe, n'uwo onoovona, nave. Nyuwo munnaamini? Nyuwo mwaarina mukattyamiho wa athiyana, mukattyamiho wa athiyana, khamurina vano. Wamini wanyu ohoovonihani ni ohookhalihani mukumi.

¹⁶¹ Nyuwo munnimwaamini Yesu Kristu, mmosaru nsana, olelo, ni mahiku othene? Vano nrowe nipweheryane matata mmosa ni mukhw'awe ni nivekele nivekelo nla no wamini, khula mmosa a hiyo, nivekele nivekelo no wamini.

¹⁶² Muluku ootthuneya, okathi oryaahu ookhuneeliwa muhina wa Mukhalelo Anyu w'oMuluku, wira niwooneni Nyuwo mweetaka vamuthukumanoni, mwaavonihaka aretta mapuro othene. Nyuwo mwa Muluku. Miyo kinvekela wira Nyuwo muvonihe muthukumano ola wothene. Wira Ephumu ya Muluku emorele tho mmurimani mwaya, ni wira asuwele wira okathi onoomala. Hiyo nrina okathi vakhani paahi tho wira nikhale mu, numala hiyo nnorowa okhala ni Ole hiyo onimphent'ahu. Ni wira vano Mukhalelo Awe oruuhe openuwa mwa atthu othene.

¹⁶³ Hiyo ninnimuulumela Satana, hiyo ninuulumela miteko sawe sothene. Mwa Nsina na Yesu Kristu, Satana, mukhume mw'atthuni.

¹⁶⁴ Othene ale anrowa omwaamini Yowo vano, ni anaakhela openuwa waya, nvenye, mwiire, "Miyo vano kinoovenya wira kaakhele openuwa waka. Miyo kinnaamini." Hata mukhalelo

anyu t'uvi, nyuwo mwaaminiru vekeekhai, nvenye. Vano muvenxe matata anyu, mwiire, "Kooxukhuru, Pwiya Yesu, mwaha w'okivoniha." Muluku okhale ni nyuwo.



EPYO Y'OVIRIKANYIHA EMK65-0118
(The Seed Of Discrepancy)

Mutthak'ola wa Munna William Marrion Branham, opaceryawene olaleeriwe ni Enkelesi Esekunta ohiyu, mahiku yettata 18 mweri wa Janeiro, 1965, w'Opatthana wa Mulaponi wothene wa Alipa a Nakoso a Ehapari yooreera yoomalela wOteli Westward Ho oPhoenix, Arizona, w'Amerika, okuxiwe wookaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2019 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org